

ASO LUA, 13 IUNI 2023

Na nofoia e le Fofoga Fetalai le Nofoa i le itula e 9:29 i le taeao.

Tatalo.

FOFOGA FETALAI: Ou te fasilasila atu ua amatalia nei Taulumaga a le Fono Aoao Faitulafono.

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene, ua ou tuuina atu nei le Faaaliga i le Fono Aoao Faitulafono mo le iloiloina o Tulafono Tau Faaofi ua faaaliga i inei:

1. Tulafono Tau Faaofi o Teuteuga Esee (Pulega Autu o Laisene) 2023.
2. Tulafono Tau Faaofi o Teuteuga o le Tulafono o Tai mo Faalavelave Faafuasei 2023.
3. Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2023.
4. Tulafono Tau Faaofi o le Pepa Faamaonia Faatekonolosi e Iloagofie ai Tagata Samoa 2023.

TUUINA ATU i lenei aso 12 o Iuni 2023.

Hon. FIAME Naomi Mataafa

TAITAI O LE MAOTA

TUSI FAAMAONIA O LE TULAGA FAANATINATI

E tusa ai ma le Tulafono Tumau 100(2) ua tuuina atu nei le Faaaliga i le Fono Aoao Faitulafono mo le iloiloina o le Tulafono Tau Faaofi ua taua i lalo i lona tulaga faanatinati.

1. Tulafono Tau Faaofi o Teuteuga Esee i Tulafono (Pulega Autu o Laisene) 2023.

TUUINA ATU i lenei aso 12 o Iuni 2023.

Hon. FIAME Naomi Mataafa

TAITAI O LE MAOTA

FOFOGA FETALAI: O le a ou le toe pelupelua le tulutuluva lilo nai tuluiga, o lea ua aga i le tai le vaipao na leoleosai i le mauga o taimasa. Ua logona foi i pu'epū ina ua talimalama le papa utusami na to'a i ai le asaga na ala mai le sulu. Foi pea ia le viiga i le Atua aua o lea ua fesilafai i manu le paia o le Palemene. O lona lava aao faaloaloa ua maleifua mai ai i le lagi e mama ma le soifua manuia o le paia o le Fonousu a le atunuu vaeatu le falalesee i usugafono a itumalo taitasi.

O paia ma mamalu o le Maota nei, o sa lava ma faiga e le avea e tumau e oo i le faavavau, e leai se vave, e leai foi se potu na te toe autalaina le paia o le Maota. Nuunuu atu ia ia Tumua ma Pule ma le latou fatuaiga tausii. Ua mamalu lena talaga i le afio o lau Afioga i le Tamaitai Palemia ma lau Kapeneta, ae a Minisita Lagolago.

Ua mapu'e mai foi lea talaga i le afio o lau Afioga i le Taitai o le Itu Agai ma sui usufono mamalu uma o le Palemene. Malo afua ailao ua maua. Ou te ofo alofa atu ma faatalofa atu i le tulaga aloaia i lo outou soifua manuia ma le lagi e mama.

E faatalofa atu foi i le afio mai o Ofisa Sili o Matagaluega ma Faalapotopotoga Tumaoti a lo tatou Malo, taeao manuia, malo le usu i lenei taeao.

I le faafofoga tapuai mai a Lana Afioga Mamalu i Le Ao o le Malo ma le Masiofo, lau Afioga i le Sui Tofia ma lou Faletua, lau Afioga i le Faamasino Sili ma le mamalu o le Faamasinoga. Faamalo le soifua manuia.

I le tapuaiga a Faauluuluga o Ekalesia Kerisiano uma i le atunuu ma le aufaigaluega faauuina o le Talalelei, matou te faatalofa atu i lenei taeao.

Samoa le atunuu pele i ou paia ma mamalu faaleaganuu aua Aiga ma Tama, Tama foi ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. E talitonu o lo o maualuga lo outou soifua manuia ma le lagi e mama. Ua faamalo folau.

E fia faaleo foi se upu faalaeiau e fai ai au ma sui o le Palemene i nisi o aiga ma afioaga i Salafai aemaise lava i le itumalo o Faasaleleaga sa molimauina le aafia i lologa i le vaiaso ua tuanai atu, e ogaoga mafatiaga

ona o aafiaga sa outou feagai ai e le gata o alatetele mo femalagaaiga ae o meatotino, seia oo lava i nisi o maota ma laoa na faaleagaina i le malosi o timuga ma lologa. E i ai le talitonuga ua silafia e le tatou Malo puapuaga ma mafatiaga ua feagai ai, e le o faigofie foi i le tatou Malo le tulaga o mafatiaga o feagai ai, ae ia outou faatuatua pea i le Atua faatasi ma le lototetele, tatou taufai tatalo pea i lo tatou Matai Sili, ua na o ia e malu ai lo outou soifua ma so matou ola i faigata ma puapuaga o le ola nei.

Le alofaiva o le tatou Maota i lenei taeao, ia i ai le agalelei o le Atua. Manuia le usugafono a lau Afioga i le Tamaitai Palemia ma lau Kapeneta, manuia le usugafono a lau Afioga i le Taitai o le Itu Agai ma sui usufono mamalu uma o le Palemene. Manuia le tapuai mai a si o tatou atunuu i ona tulaga faalupelupeina.

TUUINA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2023/2024 Nu.10, Lipoti Faaletausaga a le Matagaluega o Faalapotopotoga a le Malo mo le Tausaga Faaletupe 2021/2022.
2. P.P.2023/2024 Nu.11, Lipoti Faaletausaga a le Matagaluega o Tina ma Tamaitai, Atinae o Nuu ma Afioga ma Agafesootai mo le Tausaga Faaletupe 2021/2022.
3. P.P.2023/2024 Nu.12, Lipoti Faaletausaga a le Komisi o le Aufaigaluega o Galuega a le Malo mo le Tausaga Faaletupe 2021/2022.
4. P.P.2023/2024 Nu.13, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe 2021/2022.
5. P.P.2023/2024 Nu.14, Lipoti Faaletausaga a le Faalapotopotoga o Vaa a Samoa mo le Tausaga Faaletupe 2021/2022.
6. P.P.2023/2024 Nu.15, Lipoti Faaletausaga a le Faalapotopotoga o Eleele Tumaoti o Samoa mo le Tausaga Faaletupe 2021/2022.
7. P.P.2023/2024 Nu.16, Lipoti Faaletausaga a le Matagaluega o le Palemia ma le Kapeneta mo le Tausaga Faaletupe 2021/2022.
8. P.P.2023/2024 Nu.17, Lipoti Faaletausaga a le Ofisa o Fuainumera Faamauiina mo le Tausaga Faaletupe 2021/2022.
9. P.P.2023/2024 Nu.26, Lipoti Faaletausaga a le Pulega o Fale ma Malae Taalo mo le Tausaga Faaletupe 2020/2021.
10. P.P.2023/2024 Nu.27, Lipoti Faaletausaga a le Pulega o Fale ma Malae Taalo mo le Tausaga Faaletupe 2021/2022.
11. P.P.2023/2024 Nu.28, Tali a le Malo i le P.P.2022/2023 Nu.117, Lipoti a le Komiti o le Vaega o Atinae Eseeese i le P.P.2020/2021 Nu.128 & P.P.2021/2022 Nu.55, Lipoti Faaletausaga a le

Faalapotopotoga o Vaa a Samoa mo Tausaga Faaletupe 2019/2020 & 2020/2021.

12. P.P.2023/2024 Nu.29, Tali a le Malo i le P.P.2022/2023 Nu.112, Lipoti a le Komiti o le Vaega Tau le Tamaoaiga i le P.P.2020/2021 Nu.66, & P.P.2022/2023 Nu.31, Lipoti Faaletausaga a le Pulega o Tagata Tafafao Maimoa mai Fafu a Samoa mo Tausaga Faaletupe 2019/2020 & 2020/2021.

Ma le faaaloalo lau Afioga.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5):

1. P.P.2023/2024 Nu.30, Lipoti a le Komiti o le Vaega Tau le Tamaoaiga i le P.P.2022/2023 Nu.168, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2021/2022.

Ma le faaaloalo lau Afioga.

TULAFONO TAU FAAOFI O TEUTEUGA ESEESE I TULAFONO (PULEGA AUTU O LAISENE) 2023 – faitauga muamua

FOFOGA FETALAI: Ou te tapa lau Afioga i le Minisita mo le Matagaluega o Leoleo, Falepuipui ma le Toefuataiga Hon. Faualo Harry Jeffrey Schuster.

Afioga Hon FAUALO HARRY JEFFREY SCHUSTER (Minisita mo Leoleo ma Falepuipui, Auaunaga Tau Tinei Mu ma Faalavelave Tutupu Faafuasei): Faafetai i lau Afioga i le Fofoga Fetalai mo le avanoa. Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga Eseese i Tulafono (Pulega Autu o Laisene) 2023 i lona faitauga muamua.*

Faaluaina e le Minisita mo Galuega, Felauaiga ma Atinae Eseese.

Na faamaonia le lafo ma faitauina le Tulafono Tau Faaofi o Teuteuga Eseese i Tulafono (Pulega Autu o Laisene) 2023 i lona faitauga muamua.

TULAFONO TAU FAAOFI O TEUTEUGA O LE TULAFONO O TAUI MO FAALAVELAVE FAAFUASEI 2023 – faitauga muamua

FOFOGA FETALAI: Ou te tapa lau Afioga i le Minisita o le Faalapotopotoga o Tau i mo Faalavelave Faafuasei Hon. Leatinuu Wayne Soialo.

Afioga Hon LEATINUU WAYNE SOOIALO (Minisita mo le Faalapotopotoga o Tau i mo Faalavelave Faafuasei): Faafetai i lau Afioga i le Fofoga o le Fono i leni taeao. Viia le Atua i Lona agalelei ua mafai ona tatou toe faatasi mai i leni aso. Faafeiloai foi i lau Afioga i le Tamaitai Palemia aemaise foi le tatou Kapeneta, ia ma le mamalu o le tatou Palemene. Afio lau Afioga i le Taitai o le Itu Agai. Malo le usufono i leni taeao.

Ae ua ou tulai atu e faatu se lafo lau Afioga, Ina ia faitauina nei le Tulafono Tau Faaofi o Teuteuga o le Tulafono o Tau i mo Faalavelave Faafuasei 2023 i lona faitauga muamua.

Faaluaina e le Minisita mo Faatoaga ma Faiga Faiva, Minisita mo Galuega, Felauaiga ma Atinae Eeseese ma le Minisita mo Leoleo ma Falepuipui, Auaunaga Tau Tinei Mu ma Faalavelave Tutupu Faafuasei.

Na faamaonia le lafo ma faitauina le Tulafono Tau Faaofi o Teuteuga o le Tulafono o Tau i mo Faalavelave Faafuasei 2023 i lona faitauga muamua.

**TULAFONO TAU FAAOFI O LE PEPA FAAMAONIA
FAATEKONOLOSI E ILOAGOFIE AI TAGATA SAMOA 2023
– faitauga muamua**

FOFOGA FETALAI: Ou te tapa ma le faaloalo lau Afioga i le Minisita o le Matagaluega o Fuainumera Faamauina Hon. Leota Laki Lamositele.

Afioga Hon LEOTA LAKI LAMOSITELE (Minisita mo le Matagaluega o Fuainumera Faamauina): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Pepa Faamaonia Faatekonolosi e Iloagofie ai Tagata Samoa 2023 i lona faitauga muamua.*

Faaluaina e le Minisita mo Faatoaga ma Faiga Faiva, Minisita mo Galuega, Felauaiga ma Atinae Eeseese ma le Minisita mo Leoleo ma Falepuipui, Auaunaga Tau Tinei Mu ma Faalavelave Tutupu Faafuasei.

Na faamaonia le lafo ma faitauina le Tulafono Tau Faaofi o le Pepa Faamaonia Faatekonolosi e Iloagofie ai Tagata Samoa 2023 i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
FAAPUTUGATUPE MO LE LUMANAI MANUIA O TAGATA
2023 – faitauga muamua**

FOFOGA FETALAI: Ou te tapa ma le agaga faaaloalo lau Afioga i le Minisita o le Faalapotopotoga o Faaputugatupe mo le Lumanai Manuia o Tagata Hon. Mulipola Anarosa Ale Molioo.

Afioga Hon MULIPOLA ANAROSA ALE MOLIOO (Minisita mo le Faalapotopotoga o Faaputugatupe mo le Lumanai Manuia o Tagata): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2023 i lona faitauga muamua.*

Faaluaina e le Minisita mo Faatoaga ma Faiga Faiva ma le Minisita mo Leoleo ma Falepuipui, Auaunaga Tau Tinei Mu ma Faalavelave Tutupu Faafuasei.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2023 i lona faitauga muamua.

**TULAFONO TAU FAAOFI O TEUTEUGA ESEESE I TULAFONO
(PULEGA AUTU O LAISENE) 2023 – faitauga faalua**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e le Taitai o le Maota i lenei Tulafono Tau Faaofi, o lea o le a sagai atu loa le Fono Aoa mo le faitauga faalua ma faagasolo ai lava seia faitauina faatolu.

Ou te tapa lau Afioga i le Minisita o le Matagaluega o Leoleo, Falepuipui ma le Toefuataiga lau Afioga Hon. Faualo.

Afioga Hon FAUALO HARRY JEFFREY SCHUSTER: Faafetai i lau Afioga i le Fofoga Fetalai. Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga Eseese i Tulafono (Pulega Autu o Laisene) 2023 i lona faitauga faalua ma ou te fia tautala faamalamalama i ai.*

Faaluaina e le Minisita mo Galuega, Felauaiga ma Atinae Eseese.

FOFOGA FETALAI: Tulai mai lau Afioga i le Minisita o Leoleo ma Falepuipui ma le Toefuataiga mo lau saunoaga faamalamalama.

Afioga Hon FAUALO HARRY JEFFREY SCHUSTER: Faafetai lau Afioga i le Fofoga Fetalai. O le faavae autu o le Tulafono Tau Faaofi i Teuteuga Esee i Tulafono (Pulega Autu o Laisene) 2023 o le a faafoeina atu ai mataupu i le faataatiaina o faiga faavae mo taavale ma femalagaaiga a taavale ma laisene i luga o le aualatele e toe faafoi atu i le Matagaluega o Felauaiga i Luga o le Lauleele, le LTA, le Land Transport Authority.

O le taimi nei lau Afioga, o le malosiaga lea o lo o taofia i lalo o le malosiaga o le Komesina o Leoleo. Ma o le malosiaga lea e taofia e le Komesina o Leoleo e mafai ai ona tofia e le Komesina so o se Pulega lava po o se Matagaluega a le Malo e avea ma Pulega e vaavaaia femalagaaiga i taavale afi, e aofia ai la le tulaga lea i le laiseneina o taavale ma sala i luga o le auala ma le faataatia o tulaga o faiga faavae e feoi ai taavale i luga o le auala.

Lau Afioga o le manatu autu ua ala ai ona faia le tulaga lea, ona e tasi lava le vaega o le Tulafono lea e aiga ma tiute autu a le Matagaluega o Leoleo, o le faamalosia o le Tulafono. A o le tulaga tau i le laiseneina ma le faiga o faiga faavae i femalagaaiga, e le aiga ma tiute o leoleo. O le tiute o leoleo o le faamalosia o le Tulafono, o le puipuiina o le saogalemu o tagata, o le puipuiina o meatotino a le mamalu o le atunuu, ia faapea foi le taumafai e tuutuu i lalo le solitulafono o tagata, o tiute autu lava ia a le Matagaluega o Leoleo. O lo o talafeagai ai la le taatia pea i le Matagaluega a Leoleo le tulaga i le faamalosiaina o sala o taavale, ae tuu atu le isi vaega lea e talafeagai e ave i le Pulega o Femalagaaiga i luga o le auala lau Afioga.

E 4 Tulafono o lo o aofia i le suiga leni, o le Tulafono o le Land Transport Authority i lona Tulafono Autu 2007, o le Tulafono a Leoleo 2007, o le Tulafono i le faataatiaina ma le totogiina o sala i luga o auala mo taavale 2009, ma le Tulafono o le Faafoeina o Taavaleafi 1960.

O suiga uma i Tulafono nei lau Afioga, o le tuuina atu lea o tiute i le laiseneina o taavale ma le faataatiaina o faiga faavae i femalagaaiga a taavale i luga o auala i le Land Transport Authority. A o le faatinoina la o sala, o le aoina o sala ma le tuuina atu o sala i tagata avetaavale ma taavale e le o laiseneina, e taatia la i le vaega lea i le Matagaluega a Leoleo.

Lau Afioga o le faamalamalama tonu lena i le Tulafono nei. O vaega uma o le Tulafono o lo o umia e le Komesina le malosiaga e mafai ai ona tofia se puleaga e ave i ai tiute ia faaleoleo, o le malosiaga lena o lea o le a toe aveese mai lau Afioga, ae tuusao lava le malosiaga lena i le Land Transport Authority.

Lau Afioga o se faamalamalaga puupuu lena i le autu o le Tulafono. Ma le faaaloalo tele.

FOFOGA FETALAI: Faamalo saunoa i lau Afioga i le Minisita, ua talitonu foi ua manino le tatou Maota, malamalama i lau saunoaga e faatatau i le Tulafono Tau Faaofi. Malo faafetai.

Ia o le avanoa lenei mo ni sui usufono mamalu e fia saunoa i le tatou Tulafono Tau Faaofi. Ua avanoa le tatou Maota.

Ia se i tulai mai lau Afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO (Taitai o le Itu Agai): Faafetai i lau Afioga i le Fofoga Fetalai o le Maota ua maua se avanoa i lenei foi taeao fou.

E manatu o lea ua motu i le vasa le suigaula nai le papa, ma ua mapu foi i le to'a le tautai o le gataifale i le saunoaga faafeiloai matagofie a lau Afioga i le Fofoga Fetalai i lenei taeao. Faafetai. Ua maalo foi le iuofe e pei o le faiva i tuaau, lafo foi le asomua aua le Atua ma Lona finagalo, ma o lea ua taoto ai i lagotonu le pale o le talalelei i lenei taeao fou. Faafetai i lau Afioga i le Fofoga Fetalai. A o lele foi ua maea ona e paopaina faatupe muli o taulafoga paia o Samoa.

Ona i ai lea o le lagona, o le a ou le toe aufagaina le niuloa i lenei taeao. A o le a lelepa ia faavaatiu o aau loloa paia o le Maota ma Samoa, aua o paia ua maea ona tofi tofa e pei o le tala foi lea i le laau o le toa. Ua faafogamaua le Maota i lenei taeao fou ma Samoa i le saunoaga faamalamalama a le Afioga i le Minisita e tusa ai ma le Tulafono Tau Faaofi, Puleaina o Taavaleafi i luga o aualatetele ma le faatonutonuina o le faaogaina o aualatetele e taavaleafi. Ou te talitonu o se Tulafono Tau Faaofi taua, aua e le natia le tulaga o le faatupulaia pea o le tele o taavaleafi ua i ai i lenei vaitau ma le televave o le faatupulaia o le aofai o taavaleafi. Ae i le tele o taavaleafi ua faapena foi ona matauina ma faalavelave o lo o tulai mai i luga o aualatetele. Lea foi sa lipotia mai i le televise anapo le isi foi faalavelave tau taavale. Ma o nei lava faalavelave o nisi o faalavelave ua maumau ai le soifua o tagata o le atunuu.

O le mea lea e taua ai tele lenei Tulafono Tau Faaofi. O lo o maitauina foi e lou sui usufono le toatele o avetaavale le faautauta, le o magafagafa ma mafaufau i Tulafono o aualatetele. Ae fesiligia ai foi i lou mafaufau po o latou silafia Tulafono o aualatetele a le Malo. Se i toe silasila ane lau Afioga i le Minisita i le suega o laisene avetaavale a latou o lo o faamatuuina atu ai laisene avetaavale. Aua e foliga mai o nisi lava e pei e foliga mai e leai ni laisene avetaavale. O i e taua ai le galulue vaavaalua o le tatou Pulega ma le Ofisa o Leoleo pei ona saunoa lau Afioga e faamalamalama i lenei foi taeao i le faamalosiiina o le Tulafono.

Ae se i toe silasila i le suega lea e sue maua ai laisene avetaavale po o ua talafeagai ma atoatoa i lenei vaitau. Aua pei o lau vaai talu ai nei, e le i i ai lava se suiga tele o suega lava ia ua leva ona i ai, ae ua tele le suiga lea ua i ai i luga o aualatetele ma le feoaiga o taavale. Ae toe silasila pe i ai se isi

faiga e faafasitepu ai ona faamatuu atu laisene avetaavale, ina ia aoaoina lelei ma pasi lelei le tagata o le a tuuina atu i ai le laisene avetaavale.

E taua foi le tulaga o le saogalemu, aua pei o le auga lea ma le faamoemoe lea o tatou Tulafono o aualatetele ma laisene avetaavale, ina ia saogalemu tagata e le gata o tagata o lo o feoi i taavale ma aveina ma faafoeina taavale, ae faapea foi i latou o lo o faaaogaina le auala po o savali i luga o le auala. O le tualga taua lea i lou taofi, se i silasila ane, aemaise lava i mea o taavale tetele, loli lau pusaoloa, o mea o loli kiliva oloa faapea foi ma pasi. E le natia o lea e silafia e le i leva tele atu nei foi ona tulai mai se faalavelave tau pasi i i i le faaitu lea i Sasae, ia ma maumau ai foi se soifua o se tasi o tamalii. Se i silasila ane i le tulaga o le siakiina o taavale, ma se i silasila pe le ua talafeagai i lenei vaitau ona faaaoga fale inisia ia e ave taavale e pasi mai ai aemaise lava taavale tetele ia e taua o mea o commercial vehicles ma taavale ia e faaaoga for public transport, aua o taavale ia o lo o faaaoga tele e le mamalu o le atunuu e feoi ai.

E tele foi suiga o lo o matau i nisi o taavale, o ni mea faapipii po o ni mea faaopoopo, e le o ni mea na aumai ai i le taavale mai fafo. Ou te talitonu o lena e i ai Tulafono Faatonutonu o lo o faataoto mai ai le fua po o standards o taavale, e tatau foi ona silasila lelei i tulaga ia ma taofia taavale ia ua i ai vaega faaopoopo mai le feoi i luga o auala tetele. O le manatu lava i le saogalemu o le mamalu o le atunuu. O lo o i ai ni nofoaga e mafai ai ona o latou o lo o faia taavale na e faaaoga i ai latou taavale ma faatino ai latou faiga foi po o latou kalapu taavale i ni nofoaga e le aafia ai le mamalu o le atunuu e pei o luga o aualatetele a le tatou Malo.

O le tulaga i le resitala ma le resitala o taavaleafi, ou te talitonu o lea e silafia e lau Afioga, e tatau ona i ai se fesootaiga o le resitala lea o mea o nonogatupe ia e faamau i luga o taavaleafi o lo o faatino i le MCIL ma uta i le resitala a le LTA, ina ia aumai lau pepa o le ownership po o le pepa lea o le taavale mai le LTA o lo o taua ai i luga po o tusia i luga ni nonogatupe o faamauina ai taavale ia ua toe faatau ese atu, aua tasi lea faafitauli o lo o feagai pea ma isi, e faatau le taavale ae omai faletupe toe avatu le taavale ona o la e i ai nonogatupe, ae le o silafia e le tagata lea ua faatauina le taavale mai le isi tagata. O la e silafia e lau Afioga le mataupu lea ou te talanoa atu ai.

Lau Afioga i le Minisita, faafetai o lea ua faavae i totonu i i le Komiti, o se Komiti ua taua o le Komiti o le Saogalemu i luga o auala po o le Road Safety Committee. O lau fautuaga i sui auai o lea Komiti, e tatau lava ona i ai se sui o le FESA, o latou lea o lo o i ai le vaega o le rescue. O lea ou te matau atu e le o i ai se sui o le FESA i i i totonu o le Komiti lea, aua o lea ua matauina i isi faalavelave tau taavale o lo o tutupu i luga o aualatetele, o lo o aafia ai ni tuga e manaomia ai le rescue. E tatau ona i ai se isi o le vaega lea o le rescue. O le isi foi Matagaluega o lea ou te talitonu o lo o i lalo o le vaaiga a lau Afioga, se i silasila ane i ai. E tatau foi ona i ai se sui

o le Sosaiete a le au Inisinia, o latou ia o lo o i ai le tomai i tulaga tau taavale ma le saogalemu o taavale, o lea ua i ai le Faalapotopotoga Inisinia a le atunuu. O vaega ia e tatau ona silasila lelei i ai. E tele foi asosi a le aufai taavale laupasese po o taxi, faapea foi i latou faipasi. Se i silasila ane lau Afioga ona e taua lava le vaega lea i lou taofi, e avatu se latou sao o latou finagalo ma manatu e tuufaatasia ai faiga faavae ma Tulafono Faatonutonu aua le saogalemu o a tatou aualatetele. E taua faailoilo i luga o aualatetele, e taua faailoilo po o signs, aemaise lava la i le po, o lea e matauina e i ai nisi o vaega o aualatetele e leai ni moli faailoilo i le po. O matou lava lea mai Sasae, e le masani ona agai i le itu lea i Sisifo, vagana ua agai i le malae vaalele i Faleolo, o lo o tau aafia lava matou i le magatolu foi lea ei i i Fogaa, e leai ni moli pe a agai i le pogisa. Silasila i mea o islands na e i ina, ua leai ni mea o ni moli faailoilo. Se i silasila lenei ane i lene vaega. Pei lava sa tupu ai foi se faalavelave i se isi vaitaimi ua tuanai. Ma e taua vaega ia. O le tapulaa o le saosasoa o taavale, faatulagaina o tapulaa saosasoa o taavale po o speed limits. Atonu e silasila le Matagaluega pe i ai ni vaega o le aualatele e tatau ona fetuutuunai le saosasoa, aua e le o natia le vaitau lenei i le tele o taavale ma mea o poloka, le poloka o taavale po o queue foi ia o taavale i taeao ia ma le taimi o le afaifi. I le aualatele agai i Sasae ma le aualatele agai i Sisifo, e faapena taeao uma, mo le traffic congestion lea ou te talanoa atu ai lea e silafia e lau Afioga i le Minisita. Po o le a se fetuunaiga ina ia tau foia ai pe tuuitiitia ai faafitauli ia. Aua mo le agai i luma, e pei ona ou fai atu, o lea lava e faatupulaia le aofai ma le faateleina o taavaleafi ia e faaulufale mai i le atunuu. Ae tasi foi lene mea e tatau ona silasila i ai i taavaleafi uma lava lea e faaulufale mai i le atunuu, po o i ai ni latou certificate mai fafo, e le gata e aumai fafo, ae a taunuu iinei, e tatau lava ona i ai se siaki. E tatau lava ona i ai ni inisinia se i siaki taavale ia po o atoatoa le latou lelei i vaega aua le saogalemu i luga o tatou aualatetele.

O auala ia e agai i le malae vaalele i Faleolo, e tasi lava le speed limit o lea ou te matau e agai atu lava i Apia e tau i Faleolo. A o lea ua lautetele tatou auala, faafetai ua matagofie auala. Ae silasila pe tatau ona i ai sina passing lane foi lea i nisi vaega o le auala, ina ia tau faatafatafa isi taavale ae agai atu ona o nisi lava taavale ua fai lava sina telegese tele o le latou foi feoaiga i luga ma le faaaogaina o le aualatele i le agai atu lea.

Ia pei o vaega ia lau Afioga i le Minisita, o mea o faailoilo, saosasoa faatapulaaina, passing lane, se i silasila i ai ina ia se i tau fesoasoani i le tulaga o le poloka foi ia o taavale i le taeao ma le taimi e manava ai tagata faigaluega. Aua o lea foi e matau, e pei o le vaitau foi lea na faatulai mai ai le tatou daylight saving, lea foi la na fesui ai ma fetuunai taimi amata o aoga ma galuega. Lea la ua le o toe faaauuina le daylight saving, ia o le tulaga la lea, se i toe silasila ane lau Afioga ma le Matagaluega po o lea lava e talafeagai i le taimi nei.

O nai manatu e fesoasoani se i tau fetuutuunai ina ia tau tuutiitia ai le traffic congestion lea ua tulai mai ma le agai i luma. O lea lava ou te talanoa atu i le agai i luma ina ia tatou sauniuni pea ma tapenapena, aemaise foi la taimi foi ia o taimi ia e toatele ai tagata mai fafo e malaga mai le tatou atunuu. O lea foi e loloma mea o usugafono faava-o-Malo, lona uiga o le a pisi tele auala ma tele feoaiga i luga o aualatetele. O tulaga ia e pei ona ou talanoa atu ai.

Ae o le malosiaga ua tuuina i le Pulega a le tatou LTA lea ou te tilotilo atu i ai lau Afioga, e fai lava si popo'e o le taofi, malosiaga e faaee ai lafoga i luga o suauu, malosiaga e totogi fuapauina ai laisene o taavale. O le malosiaga e faaee ai lafoga i luga o tagata e faaaogaina auala, road users. I lou taofi, e le tatau ona toe faaeeina ni lafoga faapea i luga o tagata feoi ma tagata o lo o faaaogaina le auala. Ou te le lagolagoina foi le toe sii i luga o totogifuapauina o laisene o taavale. Ona o lea ou te matau i le Tulafono Tau Faaofi, e ese lava le totogifuapauina o laisene o taavale, ese le lafoga e faaee i luga o tagata e faaaogaina le auala po o road users.

Se i toe tagai ane lau Afioga i vaega ia. Aua o tulaga ia, afai o le fuafuaga lea o le a toe sii i luga ma faaee mai lafoga ia, e le natia le taugata o le tau o le soifuaga ua i ai nei. A toe faaopopo la ma ia lafoga, o le a mamafatu le avega, mamafatu le avega. Ae manatu i le tulaga lena, o le gafatiataulimaina o le tau o le soifuaga e pei ona i ai. Lau Afioga i le Minisita, aua a faaee la lafoga ia, o lona uiga e i luga o le faifaatoaga e fai le taavale, e i luga o le tagata faipisinisi o lo o fai le taavale, e i luga lava o so o se tagata, e oo foi i le au faifeau e fai taavale, ma so o se tagata o le a faaaogaina le auala o le a faaee i ai lafoga.

O le mea lea, na ona avatu o nai motugaafa se i silasila i ai lau Afioga ma le Matagaluega. Ae ua manatu lau Afioga i le Fofoga Fetalai, faafetai mo le avanoa. Manuia le Fono i lenei aso.

FOFOGA FETALAI: Malo faafetai i lau Afioga i le Taitai o le Itu Agai mo nisi foi o fautuaga ma nisi foi o mea taua aua le agai i luma. E ui lava ina le o tele i totonu o le tatou Tulafono Tau Faaofi, ae faafetai o lea foi e aumai fautuaga mo nisi foi o mataupu taua ma fautua atu foi i tatou sui usufono mamalu, ia e i ai lava le taimi o mea taitasi tatou te agai i ai, ae faalatele tatou lauga.

Ia ua maua le avanoa mo se tasi o sui usufono. Tulai mai le sui usufono mo Faasaleleaga 5.

Afioga PESETA VAIFOU TEVAGAENA (Faasaleleaga 5): Ia, e muamua ona momoli la'u faafetai...

Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese): Lau Afioga i le Fofoga Fetalai...

FOFOGA FETALAI: Malie lava lau Afioga i le sui usufono mamalu se i tulai mai lava le Afioga i le Minisita, leaga o lea ua agai i le Minisita lea le Tulafono lea mo le silafia e le Maota.

Tofa Hon Olo Fiti Afoa Vaai: E faamalulu atu i le Afioga i le sui usufono ua ou tulai vave atu, ina ia manino le Tulafono Tau Faaofi. O le Tulafono Tau Faaofi lava ia, o le toe faafoi o le Tulafono tuai atoa lava i tua i le laiseneina o taavale i le LTA. A o mea ia sa saunoa mai ai, e manaia foi ne i te i foi ua toe saunoa mai ai se isi, mea ia o lafoga ma tulaga faapena, o mea uma lava i totonu o le Tulafono tuai sa fai mai lena vaitaimi, a o lea la ua faafoi atu faapena. Ae manaia, e taua le finagalo, ia ona toe fai lea o se review. Ae na pau lava le mea lea e i ai, o le toe faafoi o le Tulafono lea i le LTA ia pe malilie ai. Ia o le i lava po o le leai le tali e tatau ona fai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o le mea e fia faasao.

FOFOGA FETALAI: Ia se i tulai mai lau Afioga.

Tofa Hon Lauofo Fonotoe Nuafesili Pierre Lauofo: E leai lava se mea o mea ia na ou lauga ai e le o i totonu o le Tulafono Tau Faaofi lenei. Ma o le mafuaaga lea e aumai ai ma ou talanoa i mea ia o lafoga, ona o mea fou e le o i ai i le Tulafono tuai lea ua aumai i i. Lea la e mafua ai mea o lafoga. Ae se i... pei ona saunoa lau Afioga, se i tatou o i mea taitasi a, ae mo le taimi nei mo le tapenaga a lau Afioga i le Minisita, silasila ane i le 2D(e). Faafetai mo le avanoa.

FOFOGA FETALAI: Ia, ua lelei, o lea ua maua atu. Ia, e i ai se taimi foi saunoa faamalamalama ia... aua e pei e 2 Minisita ia ua aafia i i i le Tulafono Tau Faaofi. Ae lelei ona se i faagasolo pea le tatou galuega ona outou faafofoga lea i se taimi mulimuli.

Ia se i tulai mai lau Afioga i le sui usufono mamalu mo Faasaleleaga 5.

Afioga PESETA VAIFOU TEVAGAENA: Ia se i faalua lau faafetai tele i lau Afioga i le Fofoga Fetalai. E momoli foi lau faafetai i le afio o lau Afioga i le Tamaitai Palemia ma le paia maualuga i a outou Afioga i Minisita o le Kapeneta, aemaise foi le mamalu i Minisita Lagolago. Ia, lau Afioga i le Taitai ma lenei Itu.

E faatalofa atu foi i le paia maualuga i Ofisa Sili o Pulega o Matagaluega Tumaoti a si o tatou Malo aemaise foi le afaigaluega a le Fono.

Lau Afioga i le Fofoga Fetalai, ae le i tuuina atu sou manatu i le Tulafono, na ona ou fia pai atu lava e momoli lau faafetai i si o tatou motu tele i Salafai, ona o le tulaga foi ua tulai mai i lena foi vaiaso, aemaise lava si o

tatou itumalo i Faasaleleaga, e le gata i le itumalo o lau Afioga i le Fofoga Fetalai, aemaise foi lo'u itumalo ia ma le itumalo o si o ta uso matua ia Tea. Ou te talitonu lava, e le soona tutupu fua mea faapenei pei o le pese foi lea a le matou Ekalesia. Ma e tele uiga o mea tutupu. A o lou lava talitonuga, atonu o lea ua lalata mai manuia o le tatou itumalo, ona tasi lenei itumalo lau Afioga a le Fofoga Fetalai, e ese le tele o afaina i tausga ua mavae, aemaise foi si ou itumalo. Ae ou te faafetai i le alofa o le Atua e moni lava ua faaleagaina maota ma laoa ma nisi foi o... ae o lo o pule alofa lava le Atua i le puipuiga o le soifua ma le ola o le mamalu foi o si o tatou itumalo aemaise foi le motu tele i Salafai.

O le agaga faafetai la ia te au, atonu foi ua avea le mea ua tupu, o se fagufagu foi lea i lau Afioga i le Minisita o Galuega, ona tasi lenei mataupu

na amata mai foi i le Paeaiga na tea nei a o tulai atu foi lenei Itu, na ou laga ai foi le mataupu lenei i le faalavelave sa tulai mai si ou nuu i Lano, lea na matua tafea ai faletalimalo. O lona uiga e le o se mea fou. O lea la na avatu ai pea i le Tala o le Tupe lau talosaga i le tausaga ua mavae, silasila ifo lau Afioga i le aualalaupapa lea i Lano...

Tofa Hon Olo Fiti Afoa Vaai: Lau Afioga i le Fofoga Fetalai o se mea e fia faasao...

Afioga PESETA VAIFOU TEVAGAENA: Aemaise le aualalaupapa a lau Afioga i le Fofoga Fetalai.

FOFOGA FETALAI: Ia malie le sui usufono mamalu se i tuu atu le avanoa leaga o lea ua taua le Minisita o Galuega.

Tofa Hon Olo Fiti Afoa Vaai: Malie lau Afioga i le sui usufono mamalu, o le tatou Tulafono lea e i ai o le avega o le vaega foi lea o le resitalaina o taavale i le LTA. Ae se i oo i le taimi lea e te saunoa faalauaitele mai ai ona ou talanoa atu loa lea i le mea e te atugalua i ai lau Afioga, leaga sa ou alu i o ou te le i vaai i lau Afioga, na ou alu e vaai ta itumalo. Ma lou faaaloalo.

FOFOGA FETALAI: Ia, o le fesoasoani foi lea i lau Afioga i le sui usufono mamalu. Faafetai o lea ua faafofoga le Maota i le faaleoina o mafatiaga, ae i ai le manatu, o lo o loma foi le tatou tala o le tatou tupe o i ina e avanoa ai so o se saunoaga faalauaitele aua lava le tamaoaiga lautele ma mea o tatou itumalo.

Ae i ai le fautuaga, na o le tai 15 lava tatou minute o le tatou Tulafono Tau Faaofi. Ia ma le agaga faaaloalo lau Afioga i le sui usufono mamalu.

Afioga PESETA VAIFOU TEVAGAENA: Lau Afioga i le Fofoga Fetalai, o le mea sili lava faafetai o la e faafogafoga mai si o tatou itumalo.

E ui lava ina ou te le i auai, ae o le agaga tonu lena o le Minisita o Galuega, o le fealuai aua le malolo i le fale ae fealualuai solo e vaavaai mea e tutupu.

O le agaga faafetai, o lea ua ou faaulua atua le tatou talosaga lau Afioga i le Fofoga Fetalai ma le uso ia Tea. Ioe. Ina ia ave le faamuamua i le Tala o le Tupe e fausia ai tatou auala ua leva, ua leva ona taatia o le a fausia, ae faafetai i le alofa o le Atua. Faafetai foi i le faalavelave ua tulai mai atonu o lea o le a ave ai le faamuamua.

Ae ui i lea, lau Afioga i le Fofoga Fetalai, o le a oo mai lau talanoa lau Afioga i le Tulafono. Lau Afioga i le Minisita, o lea ua taoto le tatou Tulafono o le Road Ordinance pei uma lava o le 1960 i tulaga tau alatetele. Ma atonu foi o nei suiga, o se suiga sa avatu ai foi se manatu i aso ua sola i le tulaga lea ua toe faataatia mai ai le laiseneina o taavale i le LTA. Ma ou te talitonu foi sa faapea foi ona i ai e le i mamao atu a o lea foi ua toe fai foi le suiga.

A o le uiga o se talosaga i lau Afioga i le Minisita, ona o lea ua talanoa nei le tulaga lea i laisene o taavale. O le mea muamua lava, ona o lea ua matau e lou sui usufono, o le tele o laisene nei ua ou vaai i ai u ai ai igoa o tagata foi nei, tulou le Maota i luga o plate number. Ia o le a taatia ia laisene foi nei aloaia o tulaga taualoa o le Malo e pei o le Head of States ma plate number foi ia o taavale ua faamaoti mo Minisita ma Matagaluega, aemaise foi Konesula. A o le uiga la o lau faamatalaga e fagufagu mai pea le manatu i lau Afioga i le Minisita, pe ua alagata faaletulafono ona faaoga plate number o taavale e tuu i ai igoa o tagata. Silasila foi o le tele o tatou tagata e tasi le tagata ae toetiiti 20 tagata o aiga e igoa ai. A tulai mai la faalavelave i se taavale, ia pei la o le faafaigata lena i le Tulafono, ona o lea ua ou vaai i le tele o taavale, o lea o le tele lava o tagata ua tuu i ai o latou igoa i luga o plate number o taavale.

O le isi vaega lua o lau tuualalo i lau Afioga i le Minisita, ona o le tele o aafiaga ma le tulaga pagatia ma faigata lea ua tulai mai nei i le atunuu, o le tele o faletaavale foi ia ua tatala nei i totonu o le atunuu ona o le tele o taavale, o lea ua oka taavale ae le maua ni parts. O isi taavale ia ua tele lava le afaina, pe ta'e nei le tioata i tua lau Afioga, o le mea moni lava e le mafai ona sui na o le tioata e sui atoa lava ma le keli pito i tua o le taavale, o le matua taugata lava mo tagata. A o le mea sili ona faigata a fesili i faletaavale nei ae fai mai o la e maua parts, maua mea e fau ai. O lea la ua o oi le taimi o le a alu atu le taavale ua fia laisene, ia e le mafai ona laisene, aua o le tali lea e aumai e le mafai ona laiseneina le taavale seiloga e faatino tulaga ia.

A o le isi foi la tulaga faigata o lea o le a tulai mai, afai lava la e tolu, fa masina o oka se tioata po o le a lava se vaega o le taavale e le mafai ona pasiina, ia ua toe faaopoopo le isi tau, le isi sala a le LTA e faasalaina ai le owner po o le taavale i le tuai ona laisene.

E pei o tulaga la ia foi lele e ao ona toe silasila i ai le Matagaluega, ona e le gata foi i lea, ae tilotilo aua o le tele o taavale a oka nei le tele o parts, aemaise lava le tulaga pagatia o lea ua feagai ma le lalolagi i lenei vaiata, o le tele ia o masina e faatali ai. Ona oo lea i le taimi e taunuu mai ae avatu e laisene a ua toe tuu i ai le isi tau maualuga i luga. Se i toe silasila ifo lau Afioga i le Minisita i le tulaga lea, e tatau foi ona silasila i ai i le Tulafono ina ia tuu pea le avanoa, tuu le avanoa ina ia paleni ai le laiseneina o taavale.

O le isi foi tulaga e pei o le tele o taavale tetele ia e feoai nei, o le mea moni lava o le tele, faitau lua, tolu tausaga lea o le a alu nei, o le tele lava e le o i ai ni galuega tetele, ua tele lava ina tutu, ua faigata foi ona laisene taavale ona e leai ni galuega. Po o le a se silasila i ai a le tatou Malo, aua e ala foi ona feoai nei tavaale, e i ai galuega e faatinoina. A o le tulaga i le taimi lenei, e le o i ai ni galuega i le tele o kamupani ma le aufaipisinisi, ia o lona uiga, a faapea e tu lava le taavale i le lua tausaga e leai se galuega, ia a o lea o le a toe laisene ma laisene ma laisene pea, se i toe silasila i ai lau Afioga i le Minisita po o le a se fetuunaiga ina ia paleni, e le o se tulaga foi lea faapea e fai fua. Ia silasila foi lele i se tulaga o lo o taoto ai le tamaoaiga o si o tatou atunuu i lenei vaiata.

Pei na o le pau lava lea o si vaega lau Afioga e avatu ai pea lau talosaga ia lau Afioga i le Minisita ona o le tulaga lenei aemaise lava le tulaga lea o le manao e laisene le taavale, a o lea ua faatali le tagata e ona le taavale i parts e aumai e faafou ai le taavale. Aua e leai se loto e faia e nai o tatou tagata, a tuai lava ona taunuu mai, a o le faalavelave la lea, a avatu la e laisene, ua le gata la i le totogi o le laisene, ae ua toe totogi le isi tau faaopoopo i luga. Pe le mafai ona aveese lenei tau ona e le o le tagata e ona le taavale ua mafua ai, o le tagata o lea e okaina parts o le taavale ua mafua ai le tuai. Ia ma lo'u faaaloalo lau Afioga i le Fofoga Fetalai.

FOFOGA FETALAI: Malo faafetai, faafetai foi mo le sao i le tatou Tulafono Tau Faaofi.

Ia se i tulai mai le sui usufono mo Safata 1.

Afioga LEANA RONNIE POSINI (Safata 1): Lau Afioga i le Fofoga Fetalai e fia faaali foi se manatu o lenei itumalo i le Tulafono Tau Faaofi. E muamua lava ona faafetai i le Afioga i le Minisita ma le tulaga o le toe fetuutuunai o le Tulafono. Ae i ai lava nai manatu o lenei itumalo ae tuuina atu i le Afioga i le Minisita i le tulaga o le fesuiaiga o le Tulafono.

O le maitau a lenei itumalo pei ona taua foi e nisi o sui usufono ua mavae atu, o le tulaga lea o le laisene, laisene o tatou taavale i le tulaga o lea o le a toe faafoi ma totogi ai laisene i le vaega lea o le LTA. Ae pei e mamafa lau faitau i le vaega lea e toe totogi ai foi le faaaogaina o le auala, pei o lea na taua, e mamafa foi i lenei itumalo. A fua ia matou o lea e agai mai tua le sau o le taavale o lea e sau lava i aso uma, o lona uiga o le faamanino o le

mea lea, o le faaaogaina o le auala lena. O lona uiga, o le tele o lau fealuai i luga o le auala, o le tele foi lena o se isi tupe o le a toe totogi. Aua e pei o lea ou te iloa e faapena Niu Sila, aemaise mea o taavale ia e faaoga i ai le diesel. E uma ona toe aumai lea o le tele o taimi na e fealuai ona toe totogi lea o nisi tupe. A o lea la ua maitau o lea ua toe aumai foi lea, tatou tilotilo i le mamao aemaise foi tatou i afioaga i Savaii ae afio mai iinei i Upolu ae omai i taavale, ae toe faaee i ai ma le lafoga lea o le faaaogaina o le auala, aemaise foi mea o taavale laupasese.

O lona uiga, ua toe totogi foi e le aufai taavale laupasese le totogi lea ona toe sii foi lea o le totogi o taavale. Ua atili ai ona taugata le soifuaga lea ua tatou i ai, o lea ua matua taugata lava le soifuaga lea e i ai. Ae ia au, ou te le lagolagoina le mea lea o le toe totogi o se isi lafoga i luga o le faaaogaina o le auala, leaga o le auala lea o lona uiga, e toe sii atoa lava le tau o le soifuaga, e toe faaopoopo ai le taugata i totonu o le tatou atunuu. O lea e tatalo i le teuteuga o le Tulafono lea, ou te le au i le faaaogaina o le mea lea.

Lau Afioga i le Fofoga Fetalai, i le laiseneina o taavale, o lea lava e silasila lau Afioga i le Minisita, o lea ou te maitau foi ua mautu le asosi lea a le au Inisinia i mea ia tau taavale. Pe le ave i ai taavale foi ia a tagata taitoatasi, ave e faamatuu i ai i tua i ina i le vaega lea, ae ua lava taavale foi ia laupasese e ave e siakiina e le tatou Matagaluega. E pei o fafo ia o la e ua ave, o le tele o taavale la e ua faamatuu i tua i asosi ia Inisinia ona o la e ua mautu. E leai foi se faigata o le siakiina o le aveina i tua o taavale ia a tagata taitoatasi, aua e ave lava ona fai lea o code a le fale inisinia lea e iloagofie ai le fale inisinia o lea sa pasia ai. A maua la e le Ofisa o Leoleo e le o faamaoni le fale inisinia lea, ua mautinoa lava ua toe aveese lona pemita e mafai ona laiseneina ai tatou taavale.

O le isi mea lau Afioga i le Fofoga Fetalai, na matou tapa mea ia o suega, le matou Komiti Faa-Palemene, mea ia o suega ia e fai e tatou avetaavale, sa matou tapa se i matamata ai, aua o lea e pei ona taua, ou te masalo lava o suega lava ia ua leva ona fai, ae ua tele le suiga o tatou auala, matamata i le faiga o fesili ma tulaga faapena e ala i luga o Tulafono o le auala.

O le isi foi mea lau Afioga i le Fofoga Fetalai, se i silasila ifo lau Afioga i le Minisita po o manino tatou... ua i ai se tusi foi lea taiala a tatou mea o le Road Code e malamalama uma ai tatou avetaavale. Aua o lea ou te matau i le tulaga lea, a alu atu le avetaavale e fai lona laisene, e alu atu sao lava i le LTA ona fai lea o le suega. Pe le o silasila le tatou Malo aua o lau maitau matou nei e feoi mai lava i aso uma mai tua, o le tele ia o avetaavale e le o lava le agavaa e faatino ai le taavale e ala i Tulafono. Ae pe le o silasila le tatou Malo, pe faatino e le tatou Malo pe fai foi e faamatuu i tua se aoga foi lele, se kamupani e fai se aoga avetaavale, e malamalama ai ae le i alu atu e saili lona laisene i totonu o le tatou LTA.

FOFOGA FETALAI: Malie le sui usufono mamalu se i tuu atu le avanoa i le Afioga i le Minisita o Galuega Tetele.

Tofa Hon Olo Fiti Afoa Vaai: Lau Afioga i le Fofoga Fetalai, e faamalulu atu i le sui usufono mamalu, talu ai ona o lea ua agai mai lava le saunoaga a le sui usufono mamalu i le tulaga o aoga ma road codes i aoga ia e fai ai laisene. Ne i meaane ua faapea e le i i ai ni na mea mai lava i le amataga o le Tulafono lea i le 2007 ma tua atu. Lau Afioga i le Fofoga Fetalai o lo o i ai lava mea uma na, o lea foi e i ai le tulaga o le faiga o aoga o laisene. Ma o le taimi nei o lo o fai ai le review a le Pulega o le LTA i nisi mea fou, e pei la o le tulaga lea na laga mai foi i laisene foi ia e tuu ai le igoa o le tagata ma tulaga faapena.

Ae pei lava ona ou fai atu, ina ne i o tatou vailiilia uma le Tulafono lenei, a o le Tulafono tuai lau Afioga i le sui usufono mamalu. Na o nai mea fou lava lea e tuu atu i ai ne i te i ua faapea e le i i ai se tatou galuega na fai i le 2007 i le taimi na faatu mai ai lenei Tulafono. A o lea sa tatou galulue lava, ia o mea uma lava na o lo o i ai i le taimi nei. Na pau lava lenei, e moni ai foi lau saunoaga, ia ona ua i ai mea fou ma nai suiga fou ia, ia lea la o lo o fai i ai le review a le tatou LTA. Ma le faaloalo.

FOFOGA FETALAI: Malo faafetai. Ia atonu o lea ua manino le saunoaga a le Minisita o lo o tapena ma fai le review i le tele o mataupu ia o lo o manaomia e le sui usufono mamalu.

Ia se i tulai mai lau Afioga i le sui usufono mamalu e faaauau le saunoaga.

Afioga LEAANA RONNIE POSINI: Lau Afioga i le Fofoga Fetalai, faafetai tele i lau Afioga i le Minisita. Ia o le matou lava lea tuualalo ma fautuaga e faaleleia atili ai le tatou Tulafono.

E toe tasi lava lea o se mataupu lau Afioga i le Minisita o Leoleo i mea lava ia tau taavale. Ou te masalo e tele foi taimi na ou talanoa ai i mea ia o moli ia e faaopoopo i taavale, aua o le mea moni lava e le maua i le taimi e pasia ai, ae maua aua e uma loa ona pasia ona toe fetagofi lea toe faapipii moli sulu ia. A o lea na ou manatua na ou fesili i mea ia, ae faapea e le o i ai se Tulafono. Ae faigofie lava i lau Afioga i le Minisita ona fai se Tulafono Faatonutonu e faasa ai moli sulu ia. Na faapea mai foi o moli ia e faaoga e taavale foi ia mo latou faatoaga pa manupapalagi e fai... a o le tele o taavale ia matou te fetai i po, mo taavale laiti foi ia, a o la e i ai moli sulu ia e matua le mafai lava ona e aveina le taavale pe a fetai i tulaga ia. E oo foi i tua i moli pito i tua, a oomi atu le taofi ae ola mai o moli sulu la e i tua. E matua sa lava i le Tulafono. E le mafai ona faaoga moli faapea i tua i le pito i tua pe a solomuli le taavale.

Pau lava lea i lau Afioga, a faamalosiā le tatou Matagaluega o Leoleo mo le saogalemu i le tulaga o moli ia. Ia, lau Afioga i le Fofoga Fetalai, o nai manatu na o lenei itumalo. Ma le agaga faaaloalo.

FOFOGA FETALAI: Malo faafetai. Faafetai mo le sao o le sui usufono mamalu aua foi le tatou Tulafono Tau Faaofi. Ia, ua avanoa le tatou Maota. Tulai mai lau Afioga i le sui usufono mamalu mai Satupaitea.

Afioga Hon LAUTAFI FIO SELAFI PURCELL (Satupaitea): Faafetai i lau Afioga i le Fofoga Fetalai. E faatalofa atu foi i le mamalu o le tatou Palemene i lenei taeao, i le afio o lau Afioga i le Tamaitai Palemia ma lau Kapeneta, faapea foi Minisita Lagolago faapea foi lenei Itu, afio atu le Taitai o lenei Itu ma sui usufono uma.

E faatalofa atu i Ofisa Sili o Pulega o Matagaluega ua faatasi mai lenei taeao. Malo le onosai. E faatalofa atu foi i nisi o le mamalu o le atunuu ua faatasi mai e molimauina foi lenei fonotaga.

Se i fai sina manatu puupuu lava i lenei Tulafono. Faafetai i le Minisita i le Tulafono Tau Faaofi. Ou te lagona o le Tulafono Tau Faaofi lenei e le laititi le aafiaga o tatou uma i teuteuga nei, aua o le taimi lenei, o taavale lava tatou te faamoemoe i ai i mea uma lava. So o se taimi lava la tatou te o ese atu ai i lea mea i lea mea, o le tavaale lava, o le auala lava tatou te faaogaina. O lo o i ai isi tagata i luga o le auala.

O le Tulafono la lenei Tau Faaofi, e tatau ona manino lelei ma maioio, ia malamalama lelei tagata uma lava latou te faaogaina taavale, toe malamalama lelei latou e faaogaina auala. Pe te avetaavale, pe e te savali, o le a lava le ituaiga taavale e te faaogaina, e tatau ona malamalama lelei, ia maioio lelei foi tatou Tulafono e avatu i le Maota lenei lau Afioga. E le te i te i aveese mai foi i le LTA muamua, sa i ai foi manatu, sa i ai foi mafuaaga tatau i lena foi vaitau. Ia lea ua le toe tulai mai le Paeaiiga o lo o tulai mai, e ese foi o latou finagalo. Ae tatou te galulue la ina ia fai se Tulafono ua aoga i le taimi lenei, le taimi lenei. E pei ona silafia, pei ona saunoa foi nisi sui usufono, ua tele lava suiga o taavale i le 10 tausaga talu ai e tau mai le taimi lenei. O le tele o aiga e tai-3 taavale, ten years ago e leai se taavale, e le i mafaufau faa-avetaavale, e le i mafaufau faa-tagata e faaogaina le auala, road user po o le a lana responsibility i luga o le auala. Atonu la o teuteuga ia ua tau sau i i, e tatou te togiaso i ai. O manatu foi e fai i i, e le faapea e mafai ona faapumoomoo lava na o le mea lea e tusi mai lalo o le Tulafono. Leai, leaga e tele lava le aafiaga. E tatau ona tatou vaai lautele i teuteuga nei, aua se Tulafono e aliae mai e saogalemu, ma ia saogalemu tagata uma. E pei o le auga lena o lenei teuteuga lea e aumai.

Na ala foi ona aveese mai le LTA ae tuu i lalo o Leoleo, na i ai foi mafuaaga e pei ona ou fai atu, ona ua le mautonu i latou lea e i lalo o le Traffic Division ma le vaega o Leoleo i latou matafaioi, latou matafaioi. Na ala ai loa ona aumai tuufaatasi, o outou uma e tasi lava le tou matafaioi.

Po o traffic infringement po o tulaga faapena, o lalo lava o le Ofisa o Leoleo. Ua amata ona omai faapea mai, ia e ao uma e matou tupe ae ave i Leoleo. O tulaga uma faapena e ala ai ona le mautonu ma le lelei ai le faiga o le latou galuega, lea la na ala ai ona tuu atoa i lalo o Leoleo a o lea la o le a toe vavae foi.

Ia o le talosaga i lau Afioga i le Minisita, ia faamaioio lelei responsibilities a i latou nei. O lea ou te faalogo atu i lau saunoaga faapea a oo i mea tau solitulafono o mea lava na a leoleo ae a oo i... ia o mea na a le traffic. E tatau ona manino lelei. What is a traffic infringement? O le a foi le taimi e faatino ai le galuega a le traffic e uiga i le tagata lea ua soli le Tulafono, lea ua soli le Tulafono i luga o le auala. Ia malamalama lelei le Traffic Officer o le traffic infringement lea ua tupu, pe fai mea foi lea o instant fine sa fai, po o le a le faatupega, o le a foi le faagaioiga o na mea, o tulaga faapena. O fea le mea e ave i leoleo e ave i le faamasinoga, a o mea e fai lava i lalo o le power o le LTA. Fai foi mea na o tatou instant fine na, aua ai ne i alu le taimi o leoleo i mea faatauvaa faapea, o la e i ai mea taua e o i ai leoleo. Ae fai nisi mea e fai lava i lalo o le power o le traffic officer, mea la ia pei o instant fine, mea faapena. Ia lelei le faaaogaina o resources a le tatou atunuu.

O isi lava mataupu ia tau safety lea ua tau atu e nisi o sui usufono mamalu, a o le tulaga lava lea pei o mea ia o road user charges pei ona taua. O atunuu la, e le fua i taavale, ioe, e fua i le mamafa o taavale. E pei la o le tele o latou e faaaogaina le diesel, o le taimi lena o mea o loli ma pasi. O latou la ia e ala ona tuu i ai le road user charge, aua o le tele o latou nei, e vave ona faaleaogaina le auala ma tele ai le tupe i le faiga o auala ona o latou taavale. Silasila i ai i tulaga na pe le tatau ona fai se tulaga o i ai, afai o i ai, ia pe tatau ona faaopoopo, ae aua le aafia uma le lautele o tagata i nisi tau e toe faaopoopo atu i luga atu. O lea foi ua sii le penisini, o le tiso, ua toetoe lava a le mafai e tagata ona faaaoga latou taavale. Ou te lagona o nai isi aiga o la e ua tutu isi taavale, ua tasi le taavale. E lelei, o se mea lelei e sefe ai foi tupe ma le faaaoga le tatau o le taavale, ua lava le taavale e tasi e feoai ai. A o le tulaga lena, silasila afai e i ai se mea e tatau ona faaopoopo, silasila i loli tetele, o pasi ma tulaga faapena, e faaopoopo i ai sina tau, aua o latou na e leaga gofie ai lava tatou auala. O le aitia lena i la nuu, se i silasila i ai lau Afioga.

O isi mea mo le safety, pei o isi mea ia e faaaoga soo o mea o moli ma isi mea faapena

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia malie lau Afioga i le sui usufono mamalu mai Satupaitea se i...

Afioga Hon LAUTAFI FIO SELAFI PURCELL: Se o lea ou te talanoa i le Minisita e ona le Tulafono.

FOFOGA FETALAI: Se i tuu atu le avanoa i le Afioga i le Minisita o Galuega.

Tofa Hon Olo Fiti Afoa Vaai: Ia leaga o lea e te saunoa sao mai lava ia te au. Malie lau Afioga. I le tulaga lea o lea ou te tau tilotilo atu i le Tulafono lea e saunoa soo mai ai i fees ia i luga o le tatou Tulafono Tau Faaofi. O lo o i ai lava le vaega lea i totonu o le Tulafono tuai i le Vaega 23(3) lea e manino mai i i ua lava lava la ona i ai le tulaga lea.

Na pau lava le tulaga lea e toe faamaoti mai ii ina ia mautinoa e faaofi i le Tala o le Tupe tulaga ia ma le fuafuaga la lea e oo i polokalame o le road safety i luga o le media ma mea faapena, o lea e aumai i lalo o le Tulafono Tau Faaofi, ia mautinoa ia tuu i totonu o le Budget ina ia mafai ona faatupe ai tulaga ia. O lea la ou te tilotilo atu ai i le Tulafono tuai ma le Tulafono fou lea lau Afioga, ina ne i soona toatamai mai ai lau Afioga i le sui usufono mamalu, ae o lo o manino lava tulaga ia. O le mea lava e tasi, e leai se faiga fou e faia i luga o tatou tau ia. Ma le faaaloalo lava.

FOFOGA FETALAI: Ia, atonu o lea ua manino lea vaega. Tulai mai lau Afioga e faaauau le saunoaga.

Afioga Hon LAUTAFI FIO SELAFI PURCELL: Lau Afioga e pei lava ona ou fai atu muamua, e le faapumoomooa se lauga a le sui usufono lenei, leaga o Tulafono tatou te faia ma le faaleleiga o Tulafono, e lautele lona application. O lea foi ou te tilotilo i Tulafono ia. O mea na, a o le fautuaga i le Afioga i le Minisita e ana le Tulafono se i silasila ane i ai, a le faia nei, a o nisi teuteuga e fai mai.

Lau Afioga ou te toe faaopoopo atu lava i le mea lea o le laiseneina o taavale, o le tele ia o taavale ona ua tele ituaiga potu faapitoa lea ua i ai nei, ua tele foi mea e faaopoopo i luga o taavale. O le matou pitonuu i Aleisa, e mafi ai tele le mea lea, le mea lea o le faaaoga o taavale foi lele i le po, taavale ia sa faaaoga i faatoaga tetele foi ia i la nuu. Ia atonu lava pe lua, tolu ni tagata e i ai ni latou faatoaga manupapalagi ma tulaga faapena, a o lea e feoai i aualatele. O le mea lea ou te fai atu ai, o la e lava e fetai ma leoleo, o la e foi e fetai ma traffic officers, e leai se mea o faia i ai. E leai lava ma se mea. O le mea lea e fai atu i lau Afioga i le Minisita, se i faamaioio foi lea le power o i latou nei e mafai ai ona latou taofia taavale nei. Taofi. Aua o lea e fai mai lava le faaupuga, e o loa le aualii ia e pasi le taavale, e uma loa ona pasi aveese pe a o e pasi. E oo i le taimi e uma ai ona pasi le taavale toe faapipii lea o mea ia. O la e lava foi la e iloa e leoleo ma le LTA le mea lea e tupu. A le faamalosi tatou Tulafono, ia, o le a le aoga? O le enforcement of these Laws, o le mea taua lena. O lea la ua alu

alu a isi Tulafono ia na fai e faasa ona faaleotetele laau i totonu o pasi, ia o le a le mea la e i ai? O la e fealuai le pasi i le ogatotonu o le taulaga matua patu'i mai le base, e leai lava ma se leoleo po o se traffic officer e taofia. O la e faapea leoleo o le galuega lena a le traffic faapea le traffic o le galuega lena a leoleo. Na o nai manatu e tuu atu leaga o le reality o lea e tupu, o lea lava tatou te iloa.

FOFOGA FETALAI: Ia, malie lau Afioga i le sui usufono mamalu se i tuu atu le avanoa i le Afioga i le Minisita o Leoleo mo le faamalamalamaina o le saunoaga.

Afioga Hon Faualo Harry Jeffrey Schuster: Faafetai lava i lau Afioga i le Fofoga Fetalai. Ou te tali atu i le sui usufono mamalu, leai e matua manino lava i le faamalosia o le Tulafono i le taimi lenei i le traffic division a leoleo la e i ai. Na o leoleo lava o la e i ai le vaega lena, e leai se vaega faapena o i le LTA.

O le agai foi la i luma, e leai foi ni traffic division a le LTA na o leoleo lava, o le mea lava ia tau solitulafono i le leaiseneina o lau taavale, le laiseneina o le avetaavale, o le alu saosasaoa tele o le taavale ma le tulaga o solitulafono, o le tulaga lena e pau i leoleo. Ma o lo o manino lava la le Tulafono, e faamalosia e leoleo le vaega lena. A o isi tulaga ia i le laiseneina o taavale ma tiute lea e ave i le LTA, e le aiga ma tiute o leoleo. O la e faafogafoga mai le Komesina i lau saunoaga faapea e i ai leoleo la e feoai ae le o faamalosia le Tulafono, ia o tiute uma lava o leoleo e tatau ona faamalosia le Tulafono. Ae ou te iloa mo le agai i luma o le ave o le power i leoleo e o atu leoleo e se'i sao mai lava le speaker ma mea ia i luga o le taavale, aua a tatou faia la le mea lena, e le toe feoai tagata ia ma ni mea faapea. Aua o le taimi lenei, e le o ave se malosiaga faapea i leoleo. Ae a finagalo le Maota lenei e fai le mea lena i taavale ia e sa mea ia i luga, aumai le power e ave i leoleo, so o se leoleo lava, o leoleo traffic, so o se leoleo, a alu atu loa ae maua le taavale o la e pao le mafaufau lana leitio, se'i. Ae a i ai ni moli i luga e le tatau ona i ai, aveese.

O le tali faigofie lena o le mataupu lea.

FOFOGA FETALAI: Se i onosai mai lava lau Afioga i le sui usufono mamalu se i tulai mai le Afioga i le Minisita mo Faatoaga.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau Afioga i le Fofoga Fetalai, ou te tulai ma le ava ma le faaaloalo, sa maitauina lava saunoaga a sui usufono mamalu i lenei taeao, ae pei o lo o lautagasi uma lau Afioga i le Fofoga Fetalai. Ua faatolu, faafa ona tulai atu le Minisita mo Atinae Tetele e tau faapulapula atu, e tasi lava le auga o le Tulafono, o le aumai mai o i i, pau lava lea. Ae ua ou faalogologo i le taeao lenei, e pei ua laulau mai ua i ai ni mea fou o

le a fai. O le tatou Tulafono, o le Tulafono tuai, o le Tulafono na fai i ina. Ia o le a sai la ia te ai? O lea faatoa 2 tausaga o le faigamalo o lea e tau fai atu nei mea ia na tutupu, e le o ni mea fou, a o lea e tau faafoufou atu ma tau faufau atu le suiga mo le lumanai.

O le mea lea ua ou fautuaina sui usufono mamalu, o lea foi ua saunoa faalua, faatolu le Minisita, pau lava le mea o le aumai leoleo e ave i le LTA i nisi aiaiga e faalelei mo le lumanai. Ae onosai mai. Ia e pei ua tuuai mai ia matou faapea o... fai le mea lea, fai le mea lea. A lena sa tatou i ai uma foi, e leai lava se mea na faia.

Ia pei o le agaga lena e avatu ai pea le tuualalo leaga o la e faalogologo mai le atunuu, e pei ua tulai mai, faapea a tulai mai loa nei o le a sii le tiute o luga o auala, o le a fai lea tiute ma lea mea. O le tuualalo lena sui usufono mamalu ina ia manino le faafofoga mai a Samoa.

Tofa Hon Laufo Fonotoe Nuafesili Pierre Laufo: Lau Afioga i le Fofoga Fetalai ua ou toe tulai atu e...

FOFOGA FETALAI: Onosai mai lava lau Afioga i le Taitai o le Itu Agai se i fai atu se tala a le Nofoa. O lea ua matau atu ua tatou taunuu i le taimi o le tatou malologa o le taeao. E i ai foi nai fautuaga a le Nofoa e avatu, o le tautino o galuega a lo tatou Malo, ia e i ai le manatu o le Nofoa, e lagolago lava le tatou Maota i galuega fai a le afaigaluega a le Malo, aua e le mafai ona tali mai le leoleo e tusa o tuuaiga.

Ae i ai se fautuaga faapena, o tatou foi o le Maota e tatou te liolio i le tatou afaigaluega lagolago a le Malo. Ae o lo o i ai lava tatou va faafeagai ai ma Minisita aua le faatinoina o ia fautuaga taua. Ia a o le tautino o leoleo ua le faatinoina lo latou tiute, o le uiga lena o le fesoasoani a le Nofoa. Ae ua i ai le agaga o le a tatou malolo, faataatiaese le tatou galuega mo le taeao tatou toe amata pe a uma le tatou malologa masani o le taeao.

Na faataatiaese Taulumaga a le Fono Aoaofaitulafono i le itula e 10:47 i le taeao mo lana malologa masani ma toe faaauau i le itula e 11:20 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o Teuteuga Eseese i Tulafono (Pulega Autu o Laisene) 2023.

FOFOGA FETALAI: Ou te faasilasila atu ua toe amatalia nei Taulumaga o le Fono Aoaofaitulafono. I le toe taliu mai i le tatou malologa e i ai le manatu ua maua se faasiligamalosia i le paia o le tatou Palemene, e faaauau ai le tatou galuega, faamalo le onosai. E faataatiaese a tatou taulumaga mo le tatou malologa, o lo o saunoa le sui usufono mo Satupaitea. Ae lelei foi le avatu pea e le Nofoa o le vaega lea o le tatou

Tulafono ina ia malamalama pea i ai lo tatou Maota, ona ua tele foi finagalo ua faaalua e uiga i le Tulafono lea o lafoga.

Mo le silafia e lo tatou Maota, o lo o manino lava le tatou Tulafono tuai, le Land Transport Authority 2007 i lona Vaega 19(i), o le faaupuga lava lea e tasi lea e i ai le Tulafono fou lea ua tuuina mai. Ina ia manino ona o le a tele foi o tatou manatu e agai i ai, a o lea ua i totonu o le tatou Tulafono tuai. O le mea lea, e i ai foi le manatu ina ia faamama le tatou galuega ma faafaigofie ina ia manino ai le faafogafoga mai a le atunuu, aemaise foi o outou finagalo faaalua.

O le mea lea, e tapa ma le faaaloalo lau afioga i le sui usufono mamalu mai Satupaitea, toe 2 ou minute.

Afioga Hon LAUTAFI FIO SELAFI PURCELL: E faafetai i lau afioga i le Fofoga Fetalai, atonu ua saialo le taliga o le sua a le mamalu o le Palemene, faafetai i lau afioga i le Fofoga Fetalai ma le mamalu o le Matagaluega, mo le tatou taumafataga o le taeao.

E toe faaauau atu se manatu o lena sui usufono e uiga i le Tulafono. E leai lau afioga, te i ua faauiga ese le uiga o lau tala na fai atu. O le amataga na ou fai atu, ia maioio lelei ia galuega a Matagaluega nei e lua. O tagata o lo o faigaluega ai totonu o le Matagaluega, ia iloa lelei e i latou le latou power i lalo o le Tulafono o lo o galulue ai. E leai se faatauagavale i le galuega a le Matagaluega a Leoleo, faapena foi le Matagaluega a le LTA. Ae o le auga lava o se faamatalaga, a malamalama lelei o ai e faatinoina ma faamalosi lea vaega o le Tulafono, o ai e faamalosi lea vaega o le Tulafono, atonu o le a mafai foi ona lelei le enforce ina o tatou Tulafono.

O lea e faaali mai e le afioga i le Minisita ia feeseeseaiga ia i totonu lava o Matagaluega. Lau afioga i le Minisita, afai e tataua ona avatu se Tulafono e faamanino atili ai galuega a lau Matagaluega, lau afioga e aumai ai le tulaga lena.

Tofa Hon Olo Fiti Vaai: Lau afioga i le Fofoga Fetalai,

FOFOGA FETALAI: Ia malie lau afioga i le sui usufono mamalu, se i tuu atu le avanoa i le Minisita o Galuega.

Tofa Hon Olo Fiti Vaai: O lea ua oo tonu lava le saunoaga a le afioga i le sui usufono mamalu, i le tau faamaninoga o le eseesea o matafaioi. A silasila lau afioga i le Fofoga Fetalai, i le vaega 17 o le Tulafono tuai, o lena e manino lava le tuuina atu o leoleo o galuega ia o le monitor ina o galuega a le LTA. Ne i te i o faapea lau afioga e leai se Tulafono, na o le Tulafono na tatou faia mai le 2007, o lea lava e manino o mea uma lava ia o le enforce ina o le Tulafono, o lea e manino i le tuu atu i i, i le Matagaluega a Leoleo, ma le faaaloalo.

FOFOGA FETALAI: Se i tulai mai lau afioga i le Minisita o Leoleo ma Falepuipui.

Afioga Hon Faualo Harry Jeffrey Schuster: I le 2009 na pasia muamua ai le Tulafono lea, e pau lava le mea na talosaga ai leoleo, o le traffic. Ona o le mea ua tupu, e i ai foi leoleo traffic a le LTA, ae o le eseese o le au vaega ia e lua. O le traffic a le LTA, e le mafai ona latou loka se isi, ona e le o leoleo faatauto. E pei o leoleo a tatou, e faatauto loa le alii po o le tamaitai leoleo, e 24 itula latou te mafai ona lokaina ai le tagata. Ae o le LTA, e leai se malosiaga faapena. O le eseese lenei o lea na talosagaina ai loa leoleo, aumai uma lava mea tau traffic, o le saosaoa o le taavale le laiseneina, tulaga uma lava faapea, e aumai ia matou le tulaga lenei, ae taatia pea le laisene e taatia i ina.

E i ai la le mea na tupu i le taimi lenei, ona e maua le totogi o le aufaigaluega a le LTA, ae a omai i le traffic a leoleo e pau i lalo le totogi. E pei o se eseese lenei i lenei vaitau. O le suiga lea i lenei vaitaimi lenei, e leai se mea faapena. E tumau lava le aufaigaluega traffic i leoleo, e leai se isi e alu i gauta i le LTA. O galuega foi la e faatino e le LTA i le laiseneina o taavale ma tulaga na, e le omai foi nisi i le Ofisa, e tumau lava latou i ina. E leai la se tulaga i fesuaiga o le aufaigaluega po o tiute, e tumau lava. O le mea lenei e fia faapupula atu lau afioga.

O lea ua toe foi lava i le mea na manao i ai leoleo i le 2019, na o le traffic.

FOFOGA FETALAI: Ia malo faafetai, atonu o lea ua manino lea vaega, atonu o lea e saunoa faalauaitetele foi le sui usufono mamalu aua foi fautuaga, i le faamaioioina o tiute ma galuega, ae talitonu lava o lea ua manino le vaega o le Tulafono. Ia se i tulai mai lau afioga i le sui usufono mamalu e faaauau.

Afioga Hon LAUTAFI FIO SELAFI PURCELL: Faafetai lau Afioga. O lea ou te malamalama o lea e i ai tulafono aua o matou na faia, o lenei e i ai Tulafono. Ae o se tuualalo i le afioga i le Minisita, silasila i le taimi lenei ua fai ai le mea lenei, ona o lea na ou fai atu e i ai tulafono na pasia foi, a o lea la faatoa ou vaai, e pei o la e le o lelei le enforce ina. E pei o le faataitaiga lea na ou fai atu, o mea ia o laua foi ia i luga o pasi. O lea ua amata ona oo mai ma modification o taavale. O ai tonu lava e tataua ona faia ia tulaga ia, ina ia lelei ma maopoopo lelei le tatou...o lea ua maua le avanoa tatou te fai manatu ai, ma avatu ni fautuaga i lau afioga. Ae afai o lenei ua maua le finagalo o lau afioga o la e mafai ona fai, na o le pau le mea, e na ona teuteu ma faatino.

O isi vaega ia lau Afioga e pei foi ona faaali manatu o isi, o mea ia o tatou laisene avetaavale, e lagona lava le faanoanoa i tulaga o avetaavale o lo o i ai.....

Na faataatia ese Taulumaga a le Fono Aoa mo lana malologa masani i le itula e 10:47 i le taeao ma toe faaauau ai i le itula e 11:20 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o Teuteuga Eeseese i Tulafono (Pulega Autu o Laisene) 2023.

FOFOGA FETALAI: Ou te faasilasila atu ua toe amatalia nei Taulumaga o le Fono Aoa Faitulafono. I le toe taliu mai i le tatou malologa e i ai le manatu ua maua se faasiligamalosi i le paia o le tatou Palemene, e faaauau ai le tatou galuega, faamalo le onosai. E faataatiaese a tatou taulumaga mo le tatou malologa, o lo o saunoa le sui usufono mo Satupaitea. Ae lelei foi le avatu pea e le Nofoa o le vaega lea o le tatou Tulafono ina ia malamalama pea i ai lo tatou Maota, ona ua tele foi finagalo ua faaalua e uiga i le Tulafono lea o lafoga.

Mo le silafia e lo tatou Maota, o lo o manino lava le tatou Tulafono tuai, le Land Transport Authority 2007 i lona Vaega 19(i), o le faaupuga lava lea e tasi lea e i ai le Tulafono fou lea ua tuuina mai. Ina ia manino ona o le a tele foi o tatou manatu e agai i ai, a o lea ua i totonu o le tatou Tulafono tuai. O le mea lea, e i ai foi le manatu ina ia faamama le tatou galuega ma faafaigofie ina ia manino ai le faafogafoga mai a le atunuu, aemaise foi o outou finagalo faaalua.

O le mea lea, e tapa ma le faaaloalo lau afioga i le sui usufono mamalu mai Satupaitea, toe 2 ou minute.

Afioga Hon LAUTAFI FIO SELAFI PURCELL: E faafetai i lau afioga i le Fofoga Fetalai, atonu ua saioalo le taliga o le sua a le mamalu o le Palemene, faafetai i lau afioga i le Fofoga Fetalai ma le mamalu o le Matagaluega, mo le tatou taumafataga o le taeao.

E toe faaauau atu se manatu o lena sui usufono e uiga i le Tulafono. E leai lau afioga, te i ua faauiga ese le uiga o lau tala na fai atu. O le amataga na ou fai atu, ia maioio lelei ia galuega a Matagaluega nei e lua. O tagata o lo o faigaluega ai totonu o le Matagaluega, ia iloa lelei e i latou le latou power i lalo o le Tulafono o lo o galulue ai. E leai se faatauagavale i le galuega a le Matagaluega a Leoleo, faapena foi le Matagaluega a le LTA. Ae o le auga lava o se faamatalaga, a malamalama lelei o ai e faatinoina ma faamalosi lea vaega o le Tulafono, o ai e faamalosi lea vaega o le Tulafono, atonu o le a mafai foi ona lelei le enforce ina o tatou Tulafono.

O lea e faaali mai e le afioga i le Minisita ia feeseeseaiga ia i totonu lava o Matagaluega. Lau afioga i le Minisita, afai e tataua ona avatu se Tulafono e faamanino atili ai galuega a lau Matagaluega, lau afioga e aumai ai le tulaga lena.

Tofa Hon Olo Fiti Vaai: Lau afioga i le Fofoga Fetalai,

FOFOGA FETALAI: Ia malie lau afioga i le sui usufono mamalu, se i tuu atu le avanoa i le Minisita o Galuega.

Tofa Hon Olo Fiti Vaai: O lea ua oo tonu lava le saunoaga a le afioga i le sui usufono mamalu, i le tau faamaninoga o le eseesea o matafaioi. A silasila lau afioga i le Fofoga Fetalai, i le vaega 17 o le Tulafono tuai, o lena e manino lava le tuuina atu o leoleo o galuega ia o le monitor ina o galuega a le LTA. Ne i te i o faapea lau afioga e leai se Tulafono, na o le Tulafono na tatou faia mai le 2007, o lea lava e manino o mea uma lava ia o le enforce ina o le Tulafono, o lea e manino i le tuu atu i i, i le Matagaluega a Leoleo, ma le faaloalo.

FOFOGA FETALAI: Se i tulai mai lau afioga i le Minisita o Leoleo ma Falepuipui.

Afioga Hon Faualo Harry Jeffrey Schuster: I le 2009 na pasia muamua ai le Tulafono lea, e pau lava le mea na talosaga ai leoleo, o le traffic. Ona o le mea ua tupu, e i ai foi leoleo traffic a le LTA, ae o le eseesea o le au vaega ia e lua. O le traffic a le LTA, e le mafai ona latou loka se isi, ona e le o leoleo faatauto. E pei o leoleo a tatou, e faatauto loa le alii po o le tamaitai leoleo, e 24 itula latou te mafai ona lokaina ai le tagata. Ae o le LTA, e leai se malosiaga faapena. O le eseesea lena o lea na talosagaina ai loa leoleo, aumai uma lava mea tau traffic, o le saosaoa o le taavale le laiseneina, tulaga uma lava faapea, e aumai ia matou le tulaga lena, ae taatia pea le laisene e taatia i ina.

E i ai la le mea na tupu i le taimi lena, ona e maualuga le totogi o le aufaigaluega a le LTA, ae a omai i le traffic a leoleo e pau i lalo le totogi. E pei o se eseesea lena i lena vaitau. O le suiga lea i lenei vaitaimi lenei, e leai se mea faapena. E tumau lava le aufaigaluega traffic i leoleo, e leai se isi e alu i gauta i le LTA. O galuega foi la e faatino e le LTA i le laiseneina o taavale ma tulaga na, e le omai foi nisi i le Ofisa, e tumau lava latou i ina. E leai la se tulaga i fesuiaiga o le aufaigaluega po o tiute, e tumau lava. O le mea lena e fia faapupula atu lau afioga.

O lea ua toe foi lava i le mea na manao i ai leoleo i le 2019, na o le traffic.

FOFOGA FETALAI: Ia malo faafetai, atonu o lea ua manino lea vaega, atonu o lea e saunoa faalauaitete foi le sui usufono mamalu aua foi fautuaga, i le faamaioioina o tiute ma galuega, ae talitonu lava o lea ua manino le vaega o le Tulafono. Ia se i tulai mai lau afioga i le sui usufono mamalu e faaauau.

Afioga Hon LAUTAFI FIO SELAFI PURCELL: O lea ou te malamalama o lea e i ai tulafono aua o matou na faia, o lena e i ai Tulafono. Ae o se tuualalo i le afioga i le Minisita, silasila i le taimi lenei

ua fai ai le mea lenei, ona e i ai tulafono na pasia foi, a o lea la faatoa ou vaai, e pei o la e le o lelei le enforce ina. E pei o le faataitaiga lea na ou fai atu, o mea ia o laau i luga o pasi. O lea ua amata ona oo mai ma modification o taavale. O ai tonu lava e faia ia tulaga ia, ina ia lelei ma maopoopo lelei le tatou...o lea ua maua le avanoa le avanoa tatou te fai manatu ai, ma avatu ni fautuaga i lau afioga. Ae afai o lena ua mautu le finagalo o lau afioga o la e mafai ona fai, e pau o le mea, e na ona teuteu ma faatino.

O isi vaega ia e pei foi ona faaali manatu o isi, o mea ia o tatou laisene avetaavale, e lagona lava le faanoanoa foi i tulaga o avetaavale o lo o i ai, ua tele taavale, ua tele foi avetaavale. O isi foi o lea faatoa pai lava lea i se foepuni o se taavale, o lea la faatoa... ae tele aiaiga foi lea e tatau ona malamalama i ai le taimi e oo ai i le foepuni ma alu i luga o le taavale i luga o le aualatele.

Sa i ai tatou tatou tulaga foi ia atonu po o le LTA sa... i mea ia o... se ua galo le mea talu ai le faa... le defensive driving, pe le tatau ona fai se tulaga e tau faamalosi ai le tulaga lea i avetaavale i le taimi lenei, ona ua tele naua taavale. A le agavaa le avetaavale i tulaga ia e sau ai le defensive driving, o le a tele lava le suiga. O lea a tatou o atu a alu lemu lava lana ia taavale, e faifailemu ai lava ia, ae galo ia te ia, e tele isi tagata e faaaogaina avetaavale, faaaogaina le auala lea na te faaaogaina, e tatau ona ia silafia. O tulaga faapena e faigofie ai le fealua'i o le tagata i luga o le taavale ona le maua ai lea o le mea lea ua alu ua lelava onosai oso loa, oso loa i le auala e le tatau ona overtake ai ona tupu ai lea o le faalavelave. Ae o le tulaga lena i tatou avetaavale fou le laisene e tatau ona mafaufau, e tatau loa ona compulsory loa mea ia o defensive driving po o laisene uma lava e o atu i lenei vaitau. Ia o lou talitonuga o se skill silisili ona lelei le tulaga lena i o tatou tagata ona ua le tutusa, pei o aso la, e alu alu malie lava ia i lona auala aua e leai ni taavale. A o le taimi lenei, ia, e alualu lemu loa lana taavale, po o le 30 i le 40 taavale la e o le a kiu mai tua.

FOFOGA FETALAI: Ia, faamaea mai loa le saunoaga ua maea lou taimi lau Afioga i le sui usufono mamalu.

Afioga Hon LAUTAFI FIO SELAFI PURCELL: Ia, ona uma atu ai lea o le manatu, e le taitai ona solitulafono le sui usufono o Satupaitea. O a foi ni manatu ua punitia ai se finagalo aemaise o le Matagaluega o Leoleo, e leai e le o se manatu lena e faatauagavale i la outou tautua matavela o lo o fai nei.

Ia ma le faaaloalo lau Afioga.

FOFOGA FETALAI: Malo faafetai mo le sao foi o lau Afioga i le sui usufono mamalu, o se tasi foi o sui usufono matua o le tatou Palemene.

Se i tulai mai lau Afioga i le Minisita o Galuega Tetele.

Tofa Hon Olo Fiti Afoa Vaai: Ioe lau Afioga, ona o lea ua laga soo lava le mataupu lea i avetaavale. Ou te faamoi i sui usufono mamalu i le tulaga o le eseese o avetaavale i luga o le auala. Ae i ai le faiga fou o lea ua tapena i ai le Pulega, e amata nei ia Aokuso ona tatou amata foi lea i laisene learner, e fealuai ai lava a ia i ai se supervisor foi lea mo ni itula po o le fia foi aso, ia ona faasolo atu loa lea i tulaga o permanent license.

O le tulaga foi lea e i ai o le a toe review atoa ai foi le tulaga o le faiga o laisene pei ona ou fai atu i se taimi ua sola ina ia comply ma tatou international standards foi ia, ona o lea ua faaaogaina tatou laisene i atunuu i fafo. Ae faafetai o lea ua laga mai le tulaga lea i laisene, ia, o le laasaga lena o lea ua oo atu i ai le tatou Pulega. Ma le faaloalo.

FOFOGA FETALAI: Malo faafetai. Ia se i tulai mai lau Afioga i le sui usufono mamalu mo Anoamaa 1.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1): Faafetai mo le avanoa i lau Afioga i le Fofoga Fetalai. E piiama i le faatulima i le taimi ua sola aemaise o le viiga o le Atua sa saunia e lau Susuga i le Aoao Fesoasoani, ia po o le Tama foi o le Maota. E maitauina i lenei taeao ua ese foi le faatulagaga o le tatou faafetai i le Atua. Malo. Faafetai mo suiga lelei. Ona matou faapea lea, na o sina taimi puupuu lava se i avatu se manatu o lenei itumalo e uiga i le tatou Tulafono.

O le Tulafono lea ua maua i saunoaga, o mea ia e tau e toeaia i aso ia, aua o mea nei e pei ona... e sao lelei lava. Sa matou i ai i le taimi na aumai ai le Tulafono, e sao ai le upu lena i le Fono. Se a gasea le tatou Maota. Avatu faapea aumai faapea, ona o mea o fuafuaga e le tonu ma le mautonu. Ia lea la ua toe taoto lelei lava i le mea na i ai le faamoemoega o le Tulafono. O le ala lea e manatu ai, e lagolagoina e lo matou itumalo le Tulafono. O lea ua taoto tonu lava mea tau taavale ia i latou o lo o vaaia tulaga ia e pei ona i ai le Faalapotopotoga a le LTA. Na o sina mea e talosaga atu i le LTA. A e fealuai i le itu lea, e te alu i le ta lea e tau o le S-Fault. Ae a e alu i le itu lea o le matou itumalo, e te fealuai i le ta e 3 lava masina o le pau fou leaga. Ae a laisene taavale, e tutusa lelei lava. E tutusa lava le pasi e alu i le itu lea ma le pasi e alu i le itu lea. O le mea lea, se i silasila ifo, pei e faailoga lanu le mea lea o le a i ai. A e tagai lelei ifo lau Afioga i le Fofoga Fetalai, e tataua ona tutusa. A faapea o lea ua lelei i sisifo, e tataua foi ona amanaia sasae. E tasi lena tuutuu atu i le...

O mea ia o levy ma lafoga, na ala ona tuu i le Tulafono muamua, e suetupe ai aua le isi auala fou. Pei o mea la e fai i fafo. O le agaga lena na tuu ai mea ia i i e i ai tatou tolls ma tatou road tolls e i ai se taimi o le lumanai e fai ai mea na, e fundraise ai ma toe maua ai le faalelei o auala. E

aoga le tu i i, e le o faaaogaina i le taimi nei, ae aoga i se taimi o le lumanai.

Ia, lau Afioga i le Minisita, o le sala la i Ausetalia, e ese le fefefe o tagata, e tusa lava pe uu lau telefoni pe tuu i luga o lou vae ae maua oe e le camera, e \$1000+. O le mea lea o lea e tutupu ai faalavelave lea tatou te popole ai i le vaitaimi lenei, o le tele o le mafuaaga, o le faaaoga o le telefoni. O le mea foi lea e tataua ona toe silasila i ai mo le tatou mea lea o le saogalemua i luga o auala, fai ni tatou Tulafono e siitia e tau tapui ai le tulaga o faalavelave. Ia, se i vaavaai ifo lau Afioga i tulaga ia.

Ia, na ou matamata i le tatou Tala o le Tupe lea na aumai, e leai ma se atinae o auala, leai ma se mea. E oo lava i aualagalua, e le o i ai foi se mea. A o le faafitauli lea e tupu, faatupulaia, lea e taua e isi sui usufono o le mea o le traffic congestion, o le a faatupulaia. A le faia se tatou ban i se tausaga se tasi o le import ina o...

Tape 8

Afioga ALAIASA Moefaauouo Malagaitutogiai Sepulona Moananu (Anoamaa 1): A o le faafitauli lea e faatupulaia, lea e taua e isi sui usufono o le traffic congestion o le faatupulaia. A le faia se tatou ban i se tausaga se tasi i le import ina mai o taavale, tatou te oo i ai, e le iloa po o le isi 5 tausaga ua tatou maua i le mea lea. Ae tatalo atu foi i le atunuu, onosai, e le o se faafitauli e na o Samoa le mea lea, o le faafitauli o le lalolagi atoa le mea lea o le poloka o le auala. E feoololo tatou o lea e fai ma gaioi, a o atunuu la o luga o le motorway ae poloka. E le o se mea ae na o se mea e silasila i ai le Taitai o le atunuu i le agai i luma. O i lava i Lepea le mea e pitosili ona poloka e ta loa le lua poloka, a na i ai la se hallway e alu sao i o tagata e o i o, ae o faapea le au afe. E tasi lena mea e faafoia ai le tulaga lea. Ia e leai sou malamalamaaga faainisia, ae na o se tuualalo i le susuga i le inisia o lo o tulai mai i le foe aua le faafoefoaina o tatou...O mea nei o pisinisi pasi lau afioga, ua matua aafia lava i le Koviti. E tasi lenei o pisinisi na matua mafatia lava i le taimi o le Koviti, ae o lea lava e talitali lava tatou faamanuiaga foi ia, po o fea ua fai i ai le isi vaega o tatou faamanuiaga na tufa i tatou pisinisi.

Ia alofa mai le Atua i lenei aso, ia i ai Lona agalelei i le tatou Fonotaga, maua foi le tofa i lau afioga i le Fofoga Fetalai. Ia manuia foi Minisita o le a gafa ma lenei Tulafono, ae lagolagoina le tulaga i le tatou Tulafono. Ma le faaalalo lava. Soifua ma ia manuia.

FOFOGA FETALAI: Malo saunoa i lau susuga Tumau, susuga Lufilufi, malo mo le fautuaga. O se tasi o sui matua o le Maota, malo mo le faalaeiau mo le agai i luma o le tatou Tulafono mo le atunuu. O lea ua matau atu o lea ua fou mai le sa o Vaimauga 1, o le avanoa lenei.

Afioga SULAMANAIA FETAIAI TAUILILI TUIVASA (Vaimauga 1): E momoli le agaga faafetai i lau Afioga i le Fofoga Fetalai, mo le avanoa o lenei itumalo ua tuuina mai. A o le i faia foi se sao o le Vaimauga, e muamua ona faatalofa ma ofoalofa atu i le afio o lau afioga i le Fofoga Fetalai. Ia faamalo le taitaiina o le fonosu a le atunuu.

E faatalofa atu foi i lena Itu i le afio o lau afioga i le Palemia, lau afioga i le Sao Faapito, aemaise o le afifio o alii ma tamaitai Minisita o le Kapeneta, faapea foi sui Fofoga Fetalai ma Minisita Lagolago. Ia liliu mai foi i lenei Itu, e faatalofa atu foi ma ofoalofa atu i lau afioga i le Taitai o le Itu Agai, aemaise afioga i alii ma tamaitai sui usufono o le Palemene o Samoa.

E faatalofa atu foi le afioga i le Failautusi ma lou soatau, aemaise o le Ofisa o le Fono o lo o tautuaina lenei fono. E faapea foi le maualuga i Ofisa Sili o Pulega o Faalapotopotoga a le Malo ma Matagaluega a le Malo, ia o outou o lo o lima ma vae i ai lenei Maota, faapea foi le tapuaiga a si ou itumalo.

A e le i faia se sao lau afioga i le Fofoga Fetalai, e avea foi lenei itula, e faamaise atu ai le agaga o le Atua, i si ou itumalo ona o le valaau paia a le Atua i se tasi o uso, o lo o galue i le Matagaluega o Faamasinoga le tofa ia Nuu Ropati, po o le fetalaiga ia Falepoulima. Ia faamaise le agaga o le Atua i lau susuga i le sui Resitara ona o le valaau paia a le Atua. Aemaise o le tina faanoanoa ma si o tatou aiga i Ulumalautea o le sao o si o tatou afioaga o Vailele.

Lau afioga i le Fofoga Fetalai, faafetai i le Atua ua tatou i ai i lenei masina o le tausaga faaletupe mulimuli, lenei financial year e uma ai. E faafetai foi a lenei itumalo, ona o le tulaga foi u ai ai lenei foi afa o le tausaga, o lo o see lava le sa o Samoa. O le tele foi o luitau o lo o i ai i le tatou Faigamalo, ia e lelei lava o lea tatou te malu pea Samoa.

O le Tulafono ua opea i le Maota e lagolagoina e lenei itumalo, e faafetai ai i le afioga i le Minisita ona o le tulaga foi ua i ai nei fesuiaiga. A matau foi i le tulaga sa i ai, e pei foi ona saunoa Lufilufi, pau le susuga ia Lufilufi, e pei e tau faapena se agaga.

Ae o nai tuualalo, o lea e matau, ua toe faamatuu le auunaga lenei sa i lalo o le LTA, ia ua tonu ma sao lea faaiuga. Ona o le Matagaluega a Leoleo o le faamalosiga o le Tulafono ma faapena ona molia ia e e feoai e leai ni laisene o taava. Ae o le pasiaina lava o o i le Matagaluega a le LTA, puipuia foi le saogalemu i lalo o le Matagaluega a Leoleo.

Ae o lea ua manino ma saunoa foi le Minisita o Leoleo, o le tulaga lena sa tau fia maua ai se malamalamaaga o lenei itumalo. |Ona o le traffic foi lea

sa i ai muamua, sa ese lava le traffic a le LTA ese le traffic a leoleo. A o le aua maua ua le toe i ai se tulaga lena, o lea ua tuu uma traffic i lalo o leoleo.

O le isi tuualalo e pei e popole lava lenei itumalo, i le tulaga i tagata faigaluega. E le o po se lilo i le taimi s ai lalo o le LTA o lea foi na saunoa nei le Minisita, na i ai nisi e le i fia omai, o lea na faamatuu i ai e le Malo ia tulaga tupe, e faamalolo ai i latou ae omai. O lea foi ua e tautino manino, e pei o popole na sa i ai lenei itumalo ma lenei sui usufono, i nisi sa i lalo o le Matagaluega lenei a leoleo i le faatinoga o le auaunaga, ia ua le fia o i le LTA. O le uiga la o le faafesili, pe sa tuuavanoa pea lau afioga i le Komesina o leoleo i nisi ua le fia o i o, ae o lo o fia nonofo pea i i, e manaia lava le toniga a leoleo, e pei e faapena, aua a o i o e leai se toniga. A o nisi la pe sa tuuavanoa lau afioga i le komesina o lo o fia tumau pea i lalo o lau Matagaluega ua le fia o i o. I nai faamanuiaga la na o lea e tau fai atu ai, pe o i ai.

Lona lua o tulaga tau aseta, e le o po se lilo o lo o silafia uma lava sa galulue leoleo i Fagalii, ua outou vaai la i le patu la e i o, o tupe a leoleo. Pe ua toe faapena ona toe faamatuu mai e le Minisita se vaega i aseta, aemaise o taavale ma mea faapena, e popole lava le sui.

O le isi agaga o le itumalo lenei, ua toe ave i o i le LTA, ina ia faamalosia le tulaga i le puipuiga i luga o alatele vavave. E le o po se lilo i kolosi, sa manaia lava le auaunaga a le LTA, e tutu pea nisi o le staff i le tulaga lea e i ai aoga, i le kolosi. E faapena le tuualalo a lenei sui, e toe faamalosia pea le saogalemu e le LTA, ae o lea ua maninon ma malamalama i le faatinoga a le Matagaluega a Leoleo mo le pasiaina.

O le talosaga foi e pei ona saunoa Lufilufi i nai pasi ma nai taxi. E tuualalo mai lava nai avetaxi i le afioga i le sui usufono. O le sui usufono e tele ina alu tafao i taxi stand, ia e oi i tulaga lea o le totogi faalua o laisene i le tausaga. E a pe a tatalo atu i lau afioga i le Minisita, e tasi lava le taimi e totogi ai i le amataga, ae pasi faalua pea, ona o le safety ma le saogalemu. Ae o nai isi aiga e tasi lava le taavale e feola ai lava i le tausaga atoa, ia a o lea foi e toe fai le pasiga ia Mati, toe fai ia Setema. Pe le mafai ona faamatuu ese na pasiga i le totogiina o pasi ma taavale laupasese e faatino e tasi lava le totogiina mai le tausaga.

O le talosaga i o i le pasiga o taavale lau afioga i le Minisita LTA. E vaai foi ma le alofa i le taimi e asiasi atu ai ma matamata, i le taimi lea e pasi ai taavale laupasese ia Mati ma Setema. E pei ua o atu matou nei private ma nai tagata taitoatasi, ua omia ai i i, i le taimi o le traffic lea o taavale tetele ia o pasi ma taavale laupasese. Pe le mafai ona faamatuu lava masina na, mo pasi ma taavale laupasese, ae tuu le mamalu o le atunuu.

FOFOGA FETALAI: Ia malie lau afioga i le sui usufono mamalu, se i tuu atu le avanoa i le Minisita e faamalalama atili lona finagalo.

Tofa Hon Olo Fiti Afoa Vaai: Atonu o lea e manaia le mataupu o lea e aumai e le afioga i le sui usufono mamalu, i le tulaga lea i le pasiga o taavale laupasese. O le mea lea sa i ai, e tasi lava le pasiga i le tausaga i le mea sa i ai, ae o lona tau foi lena. O le mea lea ua tulai mai, o lea ua vaelua, e vaelua foi le price, ae faalua ona pasi, ona o le tulaga foi lea o le tulituliloa o le saogalemu o taavale, aemaise lava taavale lau pasese e i ai taxi. Ae le o toe i ai se tulaga ua toe faaopoopo, e na o le vaelua lava o le totogiina masani o le tausaga, ae pasi faalua ona o le tulaga lena o le mautinoa ia saogalemu uma taavale laupasese.

O le tulaga i aseta lau afioga, o aseta uma sa agai i leoleo, o la ua toe faafoi uma aseta na, e oo foi i tagata faigaluega. Ma le faaaloalo lau afioga.

FOFOGA FETALAI: Ia malo faafetai, atonu ua manino foi le finagalo o le sui usufono, se i tulai mai lau afioga i le sui usufono.

Afioga SULAMANAIA FETAIAI TAUILILI TUIVASA: E pei ua manino foi lenei itumalo, ua faalogologo foi nai ave taxi ia na talosaga mai i le sui usufono. Le matou itumalo, o lea ua manino, e afa le totogi, pe toe avatu foi se tuualalo, ua lava lava le afa muamua lena, a o le mulimuli aua le toe totogia, pasi pea ia Setema ma aua le toe totogiina le afa lena, e pei o le agaga lena.

O le Matagaluega a Leoleo e avatu lava le tuualalo i lau afioga i le Minisita. O le tele o taimi e feoai foi ae galo le laisene avetaavale, pe ta te fai atu o la e i ai lo ta laisene, a o la e suesue lava ta ita. Ae pe le mafai ona i ai se fesootaiga lea a le Matagaluega a Leoleo ma le LTA, vili loa, se i vili atu lava le LTA e vaai ifo pe i ai se suafa o Sulamanaia i luga, o le tamaloa e oo lava i ave masini tetele e i ai lava le laisene. Ona o le tulaga lena e i ai, o la e i ai le Tulafono e feaveai lou laisene, a o tulaga e fesootaiga faapena.

E momoli foi le agaga faafetai, e i ai nai fanau e aoga i fafo, sa o ma tatou laisene. O le agaga fiafia la, e ova ma le 2 tausaga e valid lava le drivers license a tatou i atunuu mamalo, o le agaga faafetai lena i le taua o tatou laisene lea e faamatuu atu iinei, o lo o faaoga foi i atunuu i fafo e ova ma le lua tausaga. A o le fesili, e faafefea ona faamatuu ma ave laisene se i tulou lava i nai Saina? Ou te vaai atu e le iloa nanu le iloa...ae ou te vaai atu ua sau i se kiliva, na fai faa-Saina le suega, suega ia e talanoa ai i le faiga o suega ia. O lea e saunoa Leaana e ma te i ai i le Komiti o le Infrastructure, sa manaomia e aumai tulaga e fai ai suega. A o le fesili la pe faapefea la, pe ua i ai se isi o lau staff ua agavaa lava i le gagana Saina e fai ai suega. E pei o le agaga lena, e tau faaeteete lava, e le faailoga lanu lenei sui usufono, a o le faiga o suega a nai nei tagata.

FOFOGA FETALAI: Ia malie le sui mamalu, leaga o lea ua taua nai uso mai...ae lelei lava le tulai mai o le Minisita e faamalamalama lea tulaga.

Tofa Hon Olo Fiti Afoa Vaai: O le toatele lava o nai tagata Asia ia, ua lelei a latou faa-Samoa, o la foi e lelei a latou nanu. Ae mo le silafia e lau afioga, e toa lua au tagata faigaluega e i ai, o le matua lelei lava o le faa-Saina, o la la te faia le translation o mea ia. Ae a e finagalo e toe aumai ma se isi, e le afaina. A o la ua mautu lelei ia tagata faigaluega ia, latou te malamalama lelei lava i le gagana faa-Saina, ia ua ou feololo foi au i le mea lena. Ma le faaaloalo.

FOFOGA FETALAI: |O le avanoa lea lau afioga i le sui usufono, faaauau mai le saunoaga.

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai, i le tulaga i lenei sui usufono, e avatu lava le tuualalo, e pei ona fai atu, e avatu lava le lagolago ona o lea ua toe faamatu le tulaga lea i le LTA, ae o tulaga na o lo o i ai pea, e tatalo i le Minisita ona o le faagaoioiga o le system e pay ai tatou laisene i le mamalu o le atunuu. Aemaise lava aso ia e due ai nai tagata ua uma masina, e pei e tau faapena, le system i le faatinoina o le tulaga lena.

E masalo o le nofoaga lea sa nofo atu ai le sui Tamaitai o Gagaifomauga 3, sa i ai le tuafafine foi sa faipule. Sa talanoa i mea ia o pu o pasi. E pei e tau faapena se tuualalo atu pea i le Maota lenei, i pu tetele ia ua faaoga, e le gata i pasi a o taavale, o pu fai. E pei o le agaga lena lau afioga i le Fofoga Fetalai, o lea ua tautino le Matagaluega a Leoleo se i silasila ane lau afioga i le Minisita, i tulaga ia faapea faaopoopo e pei ona taua i nisi sui, o mea e le i aumaia i taavale ae ua faaopoopo. O isi o fagu ea ua o faaoga fagu ea e fai ai ia pu teuteu ia po o mea faapena. e tatalo atu ai lenei sui mamalu se i silasila ane. I le tulaga o taavale aumai fafo, se i silasila ane lau afioga i le Minisita, o lea foi e faalogologo i tala e le o maua e lenei sui, i le tulaga i tausaga o taavale. O lea na tatou talanoa ai i le toe faamatuina i o, e lagolagoina e le sui usufono, ave le tulaga i o i le LTA e toe faatino ai, ae concentrate pea leoleo i le faatinoina o le tulaga o le molia o e le i pasia ma le atoatoa. A o tausaga, e le o po se lilo i le tele o tulaga i le lapisi i totonu o si o tatou atunuu. E le umi lava ae vaai atu ua tu le taavale a lea aiga, tu lea taavale leai ni part ma mea faapena. E pei o le agaga lena se i silasila ane ina ia mafai ona silasila lau afioga, e le gata foi i lea o le tele o car dealers ua i ai i totonu o si o tatou atunuu. E fiafia lava matua, e maua loa seleni....

I le LTA, o i ina e paka ai taavale. Ia ae le o malamalama tele le mamalu o le atunuu i le faaogaina o ia foi aseta taua a lo tatou Malo, ae na o se faamanatu lena i le tatou LTA. E manaia foi ae fai ni nai a tatou awareness programme, ia pe alu foi se isi i o e faasino lelei i le mamalu o le atunuu le mea e tataua ona paka ai tatou taavale.

Tofa Hon Olo Fiti Afoa Vaai: Lau Afioga i le Fofoga Fetalai o se mea e fia faasao.

FOFOGA FETALAI: Ia malie le sui usufono mamalu se i tulai mai le Afioga i le Minisita o Galuega Tetele.

Tofa Hon Olo Fiti Afoa Vaai: E le o se galuega lena a le LTA o le o atu e faasino mea na, ma e leai lava se isi na te le silafia le mea e tau o le paka ma le vaevaeina o paka ma le makaina o paka. Ou te ofo foi au pe afai e le silafia le tulaga lena. A o le mea lena a faipule e o e fai e faasinoino itumalo pe afai e le malamalama lou itumalo i le mea e tutu ai taavale. Ia o lea foi e i ai ma le faipule o Nofaalii, lena e i ai le falemai. Se i outou fesoasoani ifo outou faipule o le itu Aana e faasino i tou itumalo mea e tau o le makaina o paka e tutu lelei ai, ae le o se galuega lena a le LTA e o atu e fai. Ma le faaaloalo.

Afioga Hon Toeolesulusulu Cedric Pose Salesa Schuster (Minisita mo Punaoa Faalenatura ma le Siosiomaga): Lau Afioga i le Fofoga Fetalai...

FOFOGA FETALAI: Se i malie le sui usufono mamalu se i tulai mai le Afioga i le Minisita mo le Siosiomaga.

Afioga Hon Toeolesulusulu Cedric Pose Salesa Schuster: Faafetai mo le avanoa lau Afioga i le Fofoga Fetalai. E leai e toe faaopoopo atu i le saunoaga a le Afioga i le Minisita i le sui usufono o lo o saunoa nei leaga o lea ua uma na fai mai e le galulue le LTA, a o lea ua fai mai e valea Aana.

E leai, so o se isi lava lau Afioga i le Fofoga Fetalai e te alu e pasi lou laisene, o le pasi o lou laisene o se tasi lea o vaega e fai ai lau suega. O signs ma vaega eseese uma i luga o le auuala, o latou uma la e i ai, e silafia uma lava, a o lea ua saunoa i ai e le iloa e tagata o lena itumalo nei vaega. E fesoasoani atu ai, e leai, e fai si mamafa o ia saunoaga lau Afioga i le Fofoga Fetalai.

FOFOGA FETALAI: Malo. Ia lau Afioga i le sui usufono mamalu.

Afioga Peseta Vaifou Tevagaena: Lau Afioga i le Fofoga Fetalai, o se mea e fia faamalamalama lau Afioga.

FOFOGA FETALAI: Ia se i tulai mai lau Afioga i le sui usufono mamalu mai Faasaleleaga 5.

Afioga Peseta Vaifou Tevagaena: Ona e manaia foi le mataupu lea o lo o talanoaina, a o lea na ou tau atua le vaega o le Tulafono foi lele le Road Ordinance 1960 lena e i ai le vaega lena o le Tulafono mo mea o wrongful parking. O lo o taoto lava le Tulafono ua uma ona i ai, ae o lo o patino lava la le tulaga lea i le Matagaluega o Leoleo. O lona uiga la, e le o le Matagaluega o le LTA. Ae na ona faamanatu atu i le Afioga i le Minisita o Leoleo le tulaga lea e avatu ai le faasea e tatau la ona i ai ni leoleo e siakiina paka ia. Ma lou faaaloalo lava.

FOFOGA FETALAI: Ia, faapea lava au e te faauilavea i i i le sui usufono lea na saunoa, a o lea e te faauilavea i o i le Minisita. E leai la e le talia lau faauilavea i o i le Minisita.

Ia, tulai mai lau Afioga i le sui usufono mamalu e faaauau lau saunoaga.

Afioga LUPEMATASILA GALUMALEMANA TOLOGATA TOGIA TILE LEI'A: Faafetai i lau Afioga i le Fofoga Fetalai. E faamalulu atu, e leai se lafoga faapea, o matou uma e omai mai Aana. E le valea foi tagata Aana, o tagata Aana o tagata e pito sili atu ona popoto. A o lea ou te fai atu i le tala lea i le mea la e tupu. Ia, ae pau lava lau fautuaga i le tatou Maota, a outou pasi atu i o i Aana, ona outou silasila lelei lea i le mea la e tupu. A o lea sa fai le galuega a le faipule e pei ona ou fai atu. Ioe. Sa ou faasinoina i tagata i lena taimi na ou alu atu ai le mea e tatau ona paka ai taavale. Ia, e le faapea o ou fai atu nei e valea tagata Aana. Oi a valea tagata Aana o au o le isi Aana? Ae faamalulu atu, o le faalavelave lea o le fesui ai o tatou o faamatalaga e avatu e tupu ai le tatou pisapisao, ae o le fautuaga lena ua avatu, ia ma le tuualalo lea e avatu i le Maota lena, a outou afifio atu i o i Aana ia ona outou vaai lea pe sao le mea lea ou te fai atu ai.

Ia ona faauma atu lea o se tala lau Afioga i le Fofoga Fetalai, afai foi ua paopapa se faamatalaga ua taumafai atu, ia e le o le agaga lena, a o le agaga e fia lagalaga i mea e faaleleia atili ai le tatou Malo. Ia manuia le tatou fonotaga.

FOFOGA FETALAI: Malo faafetai, faafetai mo le fesoasoani foi i le tatou Tulafono Tau Faaofi. Ia atonu o la foi ua i ai nai fautuaga mo le agai i luma o tatou Tulafono ma le atunuu.

Ia, se i tulai mai lau Afioga i le sui usufono mo Sagaga 1, Hon. Loau.

Afioga Hon LOAU SOLAMALEMALO KENETI SIO (Sagaga 1): Faafetai lava i lau Afioga i le Fofoga Fetalai mo le avanoa. Ou te tulai atu

ai foi ma le ava ma le faaloalo i lenei foi itula o le aso aua le Fonousu a si o tatou atunuu, o le Palemene mamalu foi.

Ia, e manatu foi o lea ua uma ona paelago paia o sa ma faiga o le taeao ma le aso i nisi foi o tootoo sa faapena ona sausaunoa aua le afio o lau Afioga i le Fofoga Fetalai, afio foi le Afioga i le Tamaitai Palemia ma le Kapeneta ia ma le la Itu o le Malu. Afio foi le Afioga i le Taitai o le Itu Agai ma lenei Itu.

Le mamalu foi o Ofisa Sili o Pulega ma Pule Sili o Matagaluega a le Malo ma Faalapotopotoga Tumaoti.

Tainane foi le matau ia Samoa potopoto i ona tulaga, ua molimauina foi le Fonousu i lenei taeao. Ia ua tele foi tootoo i lenei taeao i le Tulafono Tau Faaofi i le Afioga i le Minisita. Faafetai atu i lau Afioga i le Minisita mo le aumaiga o le Tulafono Tau Faaofi e toe teuteu ai foi nisi o tulaga pei ona i ai foi suiga ua faapena ona faatulai mai, o le toe faafoi o le faiga o laisene i o i le la itu. Ia o le fetuunai o muniao ma fefulisai faalau mamafa le tofa ma le utaga, a maua le tasi o le mea taua lena. A faapea o se mea lelei lea ua tofa i ai lena itu ma le Aiga Kapeneta ma lau Afioga i le Tamaitai Palemia, ia lelei lena mo tatou. Ou te manatu foi e auai foi lenei sui usufono e tusa ai foi ma le suiga ua i ai, ave laisene i le la itu ae enforce e outou le Tulafono.

O lou tulai atu la, ia, o le how to enforce, ioe. Aua o le mea lena o lea tatou te matauina i le taimi lenei i si o tatou atunuu, ua tele faalavelave tutupu i luga o auala, ua tele foi taavale feoai. A tatou matau i le 5 tausaga talu ai i tua, ia ua ese le tulaga lea ua tatou i ai i lenei vaitau. Aua e pei sata matau ita e lua lava pe tolu ni car dealers sa latou aumaia taavale i totonu o le atunuu, o le ASCO, o le NISSAN ia ma nisi nai... a o le taimi lenei, ua tele car dealers ma ua tele tagata ua aumaia taavale i totonu, ma ua faatuputupulaia ai foi la faafitauli. O faafitauli la na lea pei ona faapena ona sausaunoa atu ai Afioga i sui usufono mamalu, e ao ona foia.

O le fesili; pe ua sauni lau Matagaluega e faapena ona foia, ina ia aua ne i tele ni faalavelave tutupu mai, o lea foi ua tatou matauina le tele o faalavelave i luga o aualatetele ma ua maumau ai le soifua ma le ola. Ae pei e faapena sata ita tilotilo i lau Afioga i le Minisita e silasila ifo i ai. O lea foi na e saunoa ma e faapea mai i nisi o tulaga e pei ona tatou matauina, ua aga eseese lenei vaitau, ua ese le taimi sa tatou faapena ona... ua ese foi lenei vaitau i le tupulaga, o foliga vaaia, o tu ma aga. Ae pei o lata ita lena maitau. Ua oo lava i luga o aualatetele, e te le soona fai i se tamaitiiti, aua e ono laulauvavale mai, tulou le Maota ia te oe. Ae ua ou manatu au, tasi lea auala sili ona televave ai le tatou revenue e maua, ioe, o le faamalosi o le Tulafono lenei i le au e faapena ona latou faia ni aga ma ni tu ma ni foliga vaaia i luga o aualatetele e foia ai le faafitauli lea.

O lau la fautuaga i lau Afioga, a faapea e le o i ai se Tulafono e faapena ai ona outou aveesea ni meatotino, ia o lau matafaioi la lena lau Afioga i le Minisita e aumai, pe afai e te silasila atu i ai o se mea talafeagai le

faatupulaia o le tulaga lea, aemaise lava le mea lea tatou te vaai i ai o le soona faaee o le laau, loudspeaker, ioe. O isi taavale ua tuu lava i luga o mea o afi o taavale ia ona feofeoai ai lava i le auala ma ee ai lava i le aso atoa, a o la e kami atu lava i autafa o le... tulou le mamalu o le... ioe. Ai o tau atu lava foi i le isi taavale a leoleo la e sau. E le o se tala e na ma le laina ai, a o le tatou galulue faatasi e enforce le law, ia o le mea pito sili lena ona taua. Regulations ia, aumai ni Tulafono Faatonutonu e faapena ona faatino ai le Tulafono Autu lea ua...

O le vaega lena e le i uma mai le Tape 11 please

Regulations ia, aumai ni Tulafono Faatonutonu e faapena ona faatino ai le Tulafono Autu lea ua faapena ona fai le teuteuga e fesoasoani ai i lau Matagaluega.

Ia o le matou lea tuualalo atu lau Afioga i le Minisita. Ia manuia tele le Fono.

FOFOGA FETALAI: Malo faafetai. Faafetai foi mo fautuaga aemaise foi o le fesoasoani mo le agai i luma aua lava le toamalie ma le filemu e tau taofiofi foi tatou faalavelave tutupu i luga o alatetele. Malo mo le saunoaga ma le fautuaga.

Ia, se i tulai mai le sui usufono mai Vaisigano 1.

Afioga NIUAVA ETI L. MALOLO (Vaisigano 1): Faafetai i lau Afioga i le Fofoga Fetalai ua maua foi se avanoa o lenei foi itumalo. E i ai le lagona e taunuu loa foi i le Maota, o le tulai o se momoli foi o le tofa a le itumalo. E manatu o lea ua maea ona sasa le aveo, ua maea foi ona e tosi le pa ti teevao i le taeao ua sola aua foi le Atua ma lana taitaiga aua foi le Fonousu a Samoa. E manatu foi o lea ua maea ona paelago paia ma sa aua Samoa i lona aoatetele, aua foi le tapuaiga ma lana faafofoga.

E tulai foi lenei itumalo e faaleo le lagolagoina e lenei itumalo o suiga o le Tulafono e pei ona i lumamea o le Fonousu a le atunuu. E matua lagolagoina. Ae a faataoto loa le tulaga i le topography o le atunuu ma le tulaga i le mamao o i ina lea e tau agai atu ai se tatalo foi a lenei itumalo. E silafia e lau Afioga i le Minisita, ia o le itumalo pito sili atu lea ona mamao, e manatu o lea e auai foi nisi o sui mamalu o le Palemene o lo o matou omai faatasi. Ae pei a oo i le taimi e pasi ai taavale, ia e agai uma mai lava si o matou itumalo ma itumalo nei e agai mai Salelologa. E le taugofie le agai mai, ae na ona oloolo pitovaa ma tuu atu i autafa, pe le ono

mafai ona i ai se vaega o le faaitu lea i le Itu Asau e mafai ai ona faatino le tulaga o le pasiaina o taavale.

E masalo foi e le i na ma le laina le tulaga o le tele o faalavelave tau taavale e tutupu mai e le gata i le itumalo o Vaisigano 1, Vaisigano 2, Alataua ma le agai atu foi i lenei vaiaso i le weekend. Masalo ua silasila i luga o upegatafailagi i le tele o faalavelave tau taavale. Ia e le gat ai lea, sa afaina foi nisi o femalagaaiga e ala i pasi laupasese e agai mai tua o lea foi itu o le tatou atunuu. Ia, e faamalosiua ma oloolo pitovaa i le galuega, e silasila mamao foi i le tulaga i le pasiaina o nei pasi laupasese aua le malaga atu i tua aua e tofafa uma le atunuu ma fai tausiga, a o lo o folau pea lenei itumalo. O lona uiga e manaomia le vaai totoa o le Matagaluega ina ia iloa e saogalemu pasi laupasese aemaise foi tulaga o le fegasoloai o le paia ma le mamalu o le atunuu i le agai i lea foi itu o le galuega.

Ae pei o se vaega lenei ua ou tu atu ai lau Afioga e lagolago le Tulafono ma le tatalo, ia, e taumamao tele matou i tua mo le pasiaina o taavale. Ia e manaia ae avatu sina vaega e pasia ai taavale, ia po o le vaai foi o se inisinia lelei aua ua tele inisinia qualify i le matou faaitu e ave i ai le faatuatuga lea aua foi le pasiaina o taavale.

Ae lagolagoina ma le agaga faafetai le suiga e pei ona i ai le Tulafono. Ia manuia tele lau Afioga i le Fofoga Fetalai, manuia foi le Fonousu a Samoa. Faafetai.

FOFOGA FETALAI: Malo faafetai i le sui usufono mamalu. Se i tulai mai lau Afioga i le Minisita ona tuu atu loa lea o le avanoa i le Igoamatua le Afioga ia Tea.

Tofa Hon Olo Fiti Afoa Vaai: Ia, faafetai i lau Afioga i le Fofoga Fetalai, ona o lea foi sa laga e le Afioga i le Taitai o le Itu Agai le tulaga lea. Masalo a manatua e le Maota sau faamatalaga foi sa fai i le tausaga na tea nei i le Tala o le Tupe Autu sa ou folasia ai le tulaga lea o le outsource ina o le pasia o taavale. O le taimi la lenei, o lo o faatalanoa se faiga faavae mautu i le va o le Pulega o le LTA ma le asosi a le au inisinia, le mechanic, ona silasila lea i se tulaga o le au inisinia qualify lelei latou te mafai ona faatino le vaega lea. E le gata foi la i itu ia pei ona saunoa i ai le sui usufono mamalu, ae faapena foi iinei i Upolu i le itu lea i tua, ona o le tulaga foi lea o le taumamao o le mea e agai mai ai le mamalu o le atunuu foi i Vaitele faapena foi i Salelologa.

Ae o le tulaga lava ia o le laiseneina o tatou taavale laupasese, e agai uma mai lava i le tatou Pulega i Vaitele ma Salelologa pasi ma taxi. Ae faafetai leaga o lea ua ou tulai vave atu ona o lea ua lua finagalo faaalua i le mataupu lea, e moni o lo o galulue ai tatou e faatalanoaina le mataupu lea ma faamautu ni taiala e taialina ai. Ae faafetai foi o le mea lea e iloa ai, e seasea ma feiloai ma lau Sui Minisita. Sa faapea e musumusu mai ia te au,

a o lea ua lauga mai ia te au i totonu i i, ia, fai alii ma agai atu i le ta ofisa. Ia ma le faaaloalo.

FOFOGA FETALAI: Malo faafetai saunoa i lau Afioga i le Minisita.

Ia, se i tulai mai le Tama Matua, le sui usufono mamalu mai Faasaleleaga 4, lau Afioga Tea Peato.

Afioga TEA TOOALA PEATO (Faasaleleaga 4): Faafetai tele mo le avanoa. Lau Afioga i le Fofoga Fetalai, sa ou manatu lava ou te le lauga, ona o lou alofa i si ou itumalo i le mea lea ua tulai mai, ma lau Afioga foi faapea ma le Afioga ia Peseta.

Ae ua ou tulai atu ona o lenei Tulafono ua i lumamea nei. Ua ou nofo atu lava ma lou fiafia i le tele o tootoo ua maea ona sausaunoa i le Tulafono lenei. Ma ou te faamaonia lava le tele o saunoaga na ou faalogologo atu i ai. O le Tulafono foi e le o se mea fou le... sa i ai muamua foi i le LTA, a o lea ua toe foi lava i le LTA le mea lea o le laiseneina o taavale.

Ou te le... lau Afioga i le Fofoga Fetalai, ou te le talanoa tele la i le Tulafono leaga ou te le avetaavale vaeane lau Afioga ma le mamalu o le Fono. O au nei ua le toe mafai ona ou avea se taavale, se i tulou. Sa aumai lau taavale ou te fealuai ai, e i ai le plate number la e... ou te le iloa po o silafia ai sa silasila i ai Sulamanaia i le plate number la e i ai MM... O le a ea isi mea la e i ai? A o le faalavelave, ou te le avea aua ua le mafai ona ou toe avea se taavale, se i tulou. Ua leva ona ou talosaga atu pe a pe a totogi e le Malo sau avetaavale. E le mafai, e oo mai nei lava e le i totogia. Ia o lele lava la e tutu le taavale a toe aumai lava pe a toe aumai... o si au fanau lava la e o ave, si au fanau teineiti lea matou te omai. Aua foi e le mafai ona ou totogia sau avetaavale? Se ua ta talosaga faafia. Na oo lava i le Minisita o Tupe lau talosaga e leai lava. E oo mai nei lava, ia o lea ou te talosaga atu, toe aumai le taavale, leaga e le o totogia sau avetaavale, a o au ua ou matua ua le mafai ona ou toe totogia se taavale. O le ala ou tu lava lea ou te le fia talanoa i lenei Tulafono, a lavevea ai lava lavevea aua leaga po o ai lava....

Ae ou te ioeina lava le finagalo lea, se ua tele naunau taavale lea ua aumai le tatou atunuu. Ae a pe a sui se isi Tulafono e toe taofi taavale? E a? Ua tele naunau sole le mea o le taavale. Se o le isi aiga ua 5 taavale. Ioe. Ua 5 taavale a le isi aiga. Ia, ou te molimauiina, sole, se o le mea lenei o le feei o pu o taavale, lea na saunoa i ai le tele o sui usufono. Sole, o ita la e tate taoto la e tate moe, se ta te te'i i le ee o pu, ta te nofo tata ae i luga, sole o taavale la e feei lava latou i le auala, ee atu ee mai. Ou te faitioina lava leoleo, ou te ofo foi i se latou le mafai ona taofi nei taavale, o le le mafaufau o afi. Sole talofa e i si atunuu. O le matautia o le feei o taavale. Ia aua masalo o le ala tupu lea o le faalavelave lea i le matou itumalo lea na tupu nei le sau o galu ma le tafe mai uta, ona o le feei o nei pu o taavale. Sole, ia ua ou alofa lava i si ou uso lela o Peseta, ua ou faalogo atu analeila

sa lauga mai ua alofa mai lava i si o matou itumalo. Na ou faapea, talofa e ia Pese, na ou alu atu i le aso Toonai ma le Aso Sa i luga, e le o i ai, ona ou tutu ai lava lea ma ou talatalanoa i ina i beach fales la e i ai, ua leai ni mea. Ou faapea, talofa e ia Peseta, ia, a o lea e i Apia nei, a o lea ua ou faalogo atu nei ua alofa lava i si o matou itumalo. A o si ana toe saunoaga lava lea o lea ou te nofo ma au, o le ala ou tu atu lea, ia, e le tupu fua mea faapenei, atonu o se... e pei e faasea i le mea lea ua tupu mai ia matou. Fai mai ai se agasalala a le matou itumalo. Ia e aofia ai foi ma lou itumalo lau Afioga. Aua na fai mai lana saunoaga, ia, e le tupu fua mea faapenei, ona faapea lea, o lona uiga la la e faapea mai Peseta, e i ai mea sese ia e fai e le itumalo lenei ua tupu ai le faalavelave lenei. A ua leva ona ou talosaga ia Olo e alofa, se o le isi lena mea, o le sau o le vai i uta. A na alofa Olo ia au ua leva ona fai le auala lena, semeamanu ua... ua ou faafetai i le Atua. A na toe alu atu le afiafi o timu, vaeane le paia o le tatou Maota, ua leai sou fale. E matautia le sau o le... Olo, na e afio atu lava i le aso lena i o e silasila i ai e toe sau ae te le i afe ane i si toeaina la e maalili si toeaina.

A o le mea la lena ua faamalosia ai lou tulai, oso atu lava si ou afafine ma le... ou te le iloa po o fea na aumai ai, mea foi na e o... se o au ou te le iloa faaoga mea na o telefoni. Fai mai, se i silasila foi laia, vaai, se e le i fai mai se i silasila, vaai i le Fofoga Fetalai la le ua alu, ai se taavale na poloka, ona afio atu lea o le Fofoga Fetalai tau ave i lana... toso atu i lana pikiapu le taavale i Sapapalii, ae le o o ia matou. Ua alofa mai lava i si Fofoga Fetalai. Faapea, auoi talofa e i te i ua alu atu ai ma ia, i le masau o le alu... talofa e i lau Afioga. Faafetai lava i lau Afioga lou tau laveai o le... Ia Olo, ia o lea o le a ou toe tatalo atu, aua na ou faapea se i faia ia lau lauga i le Tala o le Tupe ona ou tatalo atu ai loa lea aua na ta talanoa lelei lava Olo talu ai, na e saunoa mai lava o le a fai, o le a fai lou auala ua ou alofa atu. E faalua ona ou timuia i le auala, na e silasila i ai, talu ai, ae le o le taimi lenei. Ia, ona ou faapea lea ai a... sole ae oo mai nei, e le i faia lava. Fai mai, ia la e ua uma ona ou fai i le Tamaitai CEO, ou telefoni mai le Tamaitai CEO ou faafetai atu i ai, ae leai e le i faia lava. Ou toe fai mai i ai ae fai mai, o la e ua tender lau... fai mai o la e ua tender. Ou faapea, a tender o afea e fai ai? Ia lea lava la ua sau lava le... Faafetai ua le tafea si ou fale. Ana e silasila i le sau o le mea lena, ana fai e le masau le sau o le...

Ia, lau Afioga i le Fofoga Fetalai, ina ne i umi naua sau tala, ae, Pese, ta o i Savaii nei, oi taeao, taeao ta malaga i Savaii se i e silasila, ua leva ona ou tutu, oka le malosia o le... Faafetai i le alofa o le Atua ae aua e te toe saunoa faapea e le tupu fua mala faapenei. O au na ou matua faafetai i le alofa o le Atua. Sole, o au ou te talitonu i le Atua sole. O au ou te talitonu i le Atua sole, e ese le lelei. Pe ana ua fai lava sau avetaavale, ua matua ou faafetai lava. Ia, lau Afioga i le Fofoga Fetalai, se faafetai lava i lou taumafai, ua aofia uma tatou itumalo, 3, 4, 5. Ia, e, talofa e. Tatou faafetai i le Atua sole.

Na fai lau uluai seleselega i le vaiaso atu lela, ona afio atu lea o le Afioga i le Minisita o Faatoaga ma Faiga Faiva. Na fai lau lauga i le aso lea,

faafetai i le faigamalo i le manaia sole o lau uluai seleselega, i le taupata atu o si ou itumalo. Na ou lauga ai lava lea ma ou viia ai le Palemia, masalo o la e faafofoga mai ia... ou te le i vivii Laauli, ae na ou vivii le Palemia, e ui lava ina e le i afio atu, e le i i ai lava se mea i lou itumalo ua afio atu ai le Palemia. Ae leaga la ou te iloa o la e tuatuagia tele ona tuatuagia. Ae na fai lau lauga, o le Palemia, o taimi uma lava e saunoa ai le Palemia, se ou te faateteine lava i ai i ana saunoaga. O taimi uma lava e saunoa ai le Palemia, a o la e le o i ai le Palemia i Savaii, a o lea ua fai lau... Ia ou te faafetai atu i lau Afioga i le Tamaitai Palemia, e ui lava e te le i afio atu lava i se mea i lou itumalo, ae sao lava lau tala, e te saunoa loa, se o lou fiafia ia i au saunoaga. Ou te faateteine lava i au saunoaga uma lava. Ia maua pea lou soifua laulelei aua le taitaiga o si a tatou faigamalo i lenei vaitau. Tatou galulue faatasi uma ia, omai e opogi uma le tatou tai \$1 miliona lea ua i ai, tatou galulue faatasi uma lava aua ne i toe ita se isi ona outou talitonu lea i le manuia o si o tatou atunuu.

Ua ou fiafia lava i lou vaai atu o lea o le a fai le uluai seleselega a le Nu.5, Faasaleleaga 5. Ou faapea, auoi a o lau tama o Pese lale e ita lava ia i le mea, a o lea ua ou faalogo atu o le a fai ona ou fiafia ai lava lea. Pese, I love you. Sau, afio mai tatou galulue faatasi ona e talitonu lea i ai. A o le faalavelave la o oe e leai sou maumaga i Savaii a. O lea e te i inei. Vaai, na e saunoa mai fai mai na ou fai atu ia oe, se o au ua ou le fia i ai i le itu lea, le itu la lenei... Sole ae leai na ta talanoa lelei lava. Na ta talanoa ma ta talie...

Susuga Hon Laauli Leuatea Polataivao Fosi: O le mea e fia faasao lau Afioga i le Fofoga Fetalai.

FOFOGA FETALAI: Malie lau Afioga i le sui usufono mamalu le Tama Matua, se i tuu atu le avanoa i le Afioga i le Minisita o Faatoaga leaga o lea ua taua le uluai seleselega. Tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Ioe. Faafetai. Ona o lea ua tuu le Tulafono ae lauga i mea tau faatoaga le sui usufono mamalu. O le faasaoga, e le i oo atu Peseta mo le uluai seleselega. E le i oo atu lava le faipule e uiga i le uluai seleselega, e ese sui o le itumalo na o atu. A o le faipule, ma te le i feiloai.

Leai o le faasaoga lena lau Afioga ne i te i ua e faafetai i o ae ese le mea lea e tupu.

Afioga Peseta Vaifou Tevagaena: Lau Afioga i le Fofoga Fetalai...

FOFOGA FETALAI: Ia, malie se i... o lea ua taua le suafa o Peseta, se i saunoa lau Afioga.

Afioga Peseta Vaifou Tevagaena: Ia sa usi lava le taputapuai foi i le saunoaga a si ou uso matua, ia le ta uso matua. Ioe. Ae pei lava foi ona ou avatu i le amataga, na ou ulufale mai loa i le Maota lenei, o lea lava e mau i totonu o Hansard ia a le Palemene le talosaga lava lea na ou avatu i le 2011 i le taimi faatoa ou sau ai i le Maota lenei le aualalaupapa o si ou nuu o Lano. Ua alu alu mai lena Paeaiga uma, sau i le isi Paeaiga tupu ai loa le faalavelave lea na maliu ai ua tafea le pasi, sosoo atu ai ma le tafea o le faletalimalo o si ou nuu.

E le fou la le mea lenei, e oo foi i lau Afioga lea foi sa tulai mai faafitauli o taumafai pea, e oo foi i le Afioga i le Fofoga Fetalai. Ae pei o le agaga lena o sau faamatalaga, atonu ua avea le mea ua tupu o le a finagalo ai le Afioga i le Minisita o Galuega e faatino loa tulaga nei, aua tasi lenei atinae o lea ua uma ona pasia e le Maota e faatino. E moni la o lea ua pasia, ae o lea lava e le i faatinoina, o le auala o si ou itumalo i Lano ma le auala o le afioaga o...